

四庫全書

集部

欽定四庫全書

集部
倪文僖集卷
二十九
三十

詳校官庶吉士_臣陳若霖

中書_臣劉源溥覆勘

總校官檢討_臣何思鈞

校對官中書_臣汪學金

謄錄監生_臣林大本

欽定四庫全書

倪文僖集卷二十九

明 倪謙 撰

墓誌銘

進階亞中大夫山東按察司副使致仕脊菴先生

彭公壽藏銘

先生名勗字祖期姓彭氏別號脊菴出唐定安王吉州刺史玕實宋御史中丞思永十二世孫也居廬陵山口

至六世祖司農少卿少英從信國文公起兵勤王始遷永豐之潭西故今為永豐人曾祖貴德號雪崖累科不第遂隱於醫名其堂曰種德祖景忠克紹厥志父叔敏累贈奉政大夫吏部考功郎中母黃氏封太孺人贈宜人先生素有異質幼不好弄七歲入學日誦數百言即曉大義嘗隨鄉老入寺禮佛獨不拜寺主琇師強之斥曰佛乃裸跣何拜為師大奇之考功遣從里中碩儒曾以南學不數載於經書悉通貫作為詩文詞理淵永沛

然莫禦年十六龍泉劉思文聘為塾師永樂甲午年二
十五以書經中江西鄉試明年登進士第釋褐觀政獨
念親老家貧奏乞教職就養詔許之授南雄府學教授
九載秩滿赴吏部會宣廟登極求賢試以唐相房杜姚
宋優劣論擬宋真德秀進大學衍義表過梓宮感懷詩
中首列補建寧教授蓋少傅楊公榮舉之也在官幾九
載聞父喪歸正統元年起復適朝廷設風憲官提舉學
校少傅復薦之召拜監察御史賜勅提督南直隸郡邑

儒學幾九載聞母喪歸起復冢宰王公直薦之陞吏部
考功郎中侍郎趙新惡先生不附已奏其學行雖優疎
於吏牘宜黜為府同知上不允乞歸田里不許遂求補
外僅得山東按察副使時議少之先生裕如也居四載
年六十有四以老乞致仕不許巡撫山東刑部尚書薛
公希璉為之陳乞乃許之時景泰癸酉歲也今歸休十
八年年八十有一弟昂領舉累官唐府伴讀娶阮氏封
孺人贈宜人繼謝氏二李氏封孺人繆氏封宜人呂氏

子六鉉鐸鈍鋼鑰鐔鉉清苑縣丞鐸國子生鋼府學生
女六適王誠明馮長勲周京岳秀蕭襄夏超孫男六洪
潤澄濟淮湖濟縣學生曾孫男五先生在南雄時勤身
脩職端介自守得一美衣食必先寄親諸生惟事記誦
陳文僥倖乃令各置經書熟讀講解教其為文選陳綱
等二十人躬誨以導多所造就學舊有神女祠能作禍
福先生初至家人詹暴死衆為禱神而甦乃積薪焚之
平其地為厠布政司委同禮部主事彭孚恂督修郡縣

志書所至不受餽遺應聘考雲南鄉試入廣南府界
有稱臨安府生者以黃金為贄拒不納至則黔國沐公
晟都帥沐公昂及布按二司禮待甚重請主文衡出題
餘不預乃知前生故遣嘗試也在建寧前此尸教者多
以貪酷被黜學規久弛先生至一新教條率之以正士
氣勃興嘗奏褒崇先賢朱子其詞謂孔子刪述六經垂
憲萬世集羣聖之大成朱子註釋六經裒集諸子集羣
賢之大成今朝廷於孔子闕里春秋廟祭設官教其子

孫以爵貴其嫡嗣亡於朱子建寧舊宅祭其祠教其子
孫蠲其徭役疏上公議建之又建尊賢堂祀建之先儒
若胡安國蔡九峯真德秀耆民許崇道以醫畫得倖權
貴與生負游享有隙時按察副使王增在分司邁疾疑
魔魅崇道即以亨居近童五郎祠入誣增惑之收亨父
叔七人株連者四百餘家先生因官吏聚揖對之辯其
誣增忻然盡釋逮者嘗歷考浙江湖廣鄉試士服公明
著書傳通釋有益後學在南直隸不猛不苛甚得大體

教人必倍誦經書史籍而後較其藝勸導有方士樂甄
陶人材輩出嘗辨嘉定民朱行等三人非謀殺建平陳
良二等十五人非強盜衆服其明効罷教諭周子葛溫
彥澄訓導劉獻胡溶徐善同揚州知府李貞安慶知府
陳泰郡縣悚惕修葺各處學校及漢五更桓榮大司農
朱邑吳將周瑜宋儒胡安定歐陽永叔朱晦菴游定夫
元學士危素高郵守李齊等墳祠士知尚義奏毀天下
叢林寺觀停給僧牒及勒年少僧尼還俗禁剏寺菴修

設齋醮又乞免徵戶口鹽鈔賑濟飢民糧買陪葶救馬
牛考校守令宜以逃民多寡為殿最無舉人教官宜考
不通經降用取人宜開解額多見采納在考功凡赴選
官曾犯公罪者舊皆降用先生白於堂謂宜依不降律
雜流官犯罪者不論功績即於原授資級降先生又白
宜從當陞資級降皆如其議吏役歷滿叅問重歷初無
定規先生奏乞定為條例在山東車駕北狩奉勅操練
軍馬固守城池簡民兵飭軍器屢抗攘外安內之疏循

行郡縣無不親歷以洗冤澤物為已任所至懷賢吊古
多形賦詠有勝覽詩集及著各郡通誌藏濟南府學先
生歸江浦張公瑄常熟程公宗相繼來為郡守皆先生
門下士也時來謁見絕無私囑惟以均徭決獄愛民利
物為勉二公佩服皆為良吏先生歷仕幾四十年囊無
餘貲以遺子孫詩書業業與布衣時不異成化改元詔
進階為亞中大夫優游桑梓清德雅望為鄉邦所重先
生內無城府與人交以誠信坦易可親先生常得吉壤

於里之東陂烏臺山乃為壽藏於斯欲謙為銘以誌命
子玪具葉教授孟明所述行實來寓謙所謙昔嘗授教
講席先生不以謙為非侶過蒙獎許辱知愛甚厚恒念
無能為役茲承嚴命敢以不文辭謹按狀序次之繫之
以銘銘曰

大江之西山川融結靈秀所鍾挺生賢哲得氣之正美
姿異常龍泉淬礪凜乎鋒鉞學博而精履行純篤少為
儒宗講道鄉塾為親而出名科是登俯就儒祿咸以孝

稱橫經皋比一洗陋習教鐸再宣士多成立惟昔先賢
有功斯道修祀追崇光我名教手秉憲節施教益洪時
雨所及藹乎春融義行如秋稜稜面缺無枉不伸有姦
必折言苟見用道由以行遠由反告誰其鳳鳴入司黜
陟執德不回曾謂神駿而可絀羈出登外臺清操愈厲
海表澄清澤亦遠被翩然解組進退從容時行時止合
道之中垂橐而歸全名保節冰鑑玉壺一塵不涇國之
楨幹士之範模俯仰無媿聖賢之徒樂丘斯營達觀一

世載德貞珉用詔來裔

承德郎應天府通判林公墓誌銘

公諱春字孟陽姓林氏其先台之寧海人曾祖某洪武
初以戎事遷居金陵祖某又遷山西太原府古護衛父
本榮又遷代州至公又遷萬全都司龍門守禦千戶所
至宣府乃定居焉公生於太原性資穎異有志於學比
來宣府時縉紳儒碩謫居於是者衆公往從之資其講
益入萬全都司為弟子負習尚書精究典謨訓誥誓命

之旨博覽羣籍學日宏肆為程試之文深有理致尤工
古文辭鄉人多持卷軸求之家有其作精於書翰師蔣
廷輝黃養正鎮邊重臣若都憲羅公亨信李公秉侍郎
劉公璉參政葉公盛皆雅愛之深相推重景泰庚午應
順天府鄉試中式會試中副榜當得校官不就入太學
放依親歸參政舉同纂修都司地誌搜考訂定善於序
述持身端慎遨遊公卿間惟以禮接一言不及外事有
事逮繫者多賫重賄要其借重解釋力謝絕之雖以禮

遺以金帛者亦却不受人皆曰士居貧而能有守若此
真難得矣復入太學從翰林學士呂文懿公卒業志期
必舉進士文懿嘗嚮予道公之學之才之美予已知其
人而未識也天順中予為權穴所陷謫宣府嘗至學中
見少師楊文貞公扈從北征詩刻石堂上碑陰刻吏部
尚書王文安記公所書也予初以為養正書問之乃云
公書又於他處見其所書已作甚多歎曰名下無虛士
信哉未幾公乞假歸始獲面晤言溫氣和薰然君子也

鄉人素愛之延請者無虛日多速予以陪公能飲至數斗不亂酒半必握拳商射呼笑為懽意度洒如也後別去意必舉進士竟不成待次吏部僅授應天府通判專理馬政人咸為之惜公曰始仕得六品京官於吾足矣所患職弗能稱耳及至官以清節自厲攻駒考牧恪盡乃心公平不苛民受其惠無敢干以私者每行縣較閱止食公廩一毫不取於民時疏公解隙地至則摘以自給其廉如此或有笑其迂者公曰我儒者誠迂若楊伯

起則古之迂者也我願學焉初考獻績於朝吏部以覈
聞詔嘉之錫以勅命進階承德郎贈其父如公官贈封
母妻皆安人再考復以覈書政聲日起性酷好書每暇
輒磨墨伸紙揮汗呵凍寒暑不廢字體清勁遒麗得之
者皆珍襲之予幸被宥還復得與公胥晤南京相處者
六載每造公必留飲至醉呼笑之樂不減疇昔今年暑
氣最熾公中暑毒適當開科屬理場屋事勞遂成痢疾
不能食予往視之言論尚如平時不數日竟卒嗚呼孰

意其遽止於斯哉公為人外雖和易而內實剛毅處兄弟友愛交朋友誠信接寮窠敦睦居官孳孳愛民廉介之操乃其素志不以始終有變故其卒也貧無以為殮裒積衆賻僅能舉其喪歸其制行可見矣公生於永樂辛卯七月九日卒於成化辛卯九月五日享年六十有一配朱氏子男四澤娶田氏潤娶宋氏浹泗幼女二淑蘭適士人袁寬淑蕙在室孫男四熙輝炫熠孫女一公之卒也予吊而哭之澤等泣拜曰不肖孤遵先人治命

將扶柩歸宣府卜以明年月日祔葬城東祖塋先生辱
交先人最厚墓上之石敢以累先生嗚呼予曷忍授筆
銘公之墓乎雖然予不銘當孰銘者乃為之銘銘曰
已乎孟陽才高當世而德重一鄉已乎孟陽五十為郡
而六十告亡志方行而未大惠已洽而皆讓一塵不涇
賢聲振敷顯陟不待噫其可傷予發其潛使後之過者
知其為廉吏之藏

勅封承德郎兵部主事盧公墓誌銘

公諱清字茂林姓盧氏姑蘇吳縣人也高祖諱榮曾祖諱名祖諱鎰國初知福州府永福縣考諱成甫母包氏公自幼孝友出於天性年六歲時包有疾公依依母側憂泣不食醫至輒向之拜泣醫為感動昆季四人公齒居三凡事知敬讓二兄永樂中負外張公某承旨取匠於蘓限里報數成甫時為里正不忍以平人桀報懼責避匿官索之急公時年十五即代父赴官致被箠責怡然不怨恐人以為難年十七即能幹蠱挾賢往遊陝右

翰林檢討吳公公祖母弟也居官南京公貿易還因往
省之滯留者久之藝聞知者遂以名薦入尚方辭不克
釋因寓於京公寬和公正守備太監羅公深愛重之工
作之事悉令總任命協贊南京工部郎中王公用督理
衆工咸有成緒癸卯歸省於吳值母有疾焚香於臂
以禱母疾果瘳後以身縻於官不獲歸養時迎二親就
養京師後父母相繼歿於吳中痛弗克歸襄大事茹哀
成疾乃命子雍還吳合葬之於橫路橋側彭華村之原

公性鯁直正大無所回曲人有過即面折之有相爭者就質於公以理論之無不聽服釋去宅心忠厚尤仁慈雖無贏貲而好施不吝嘗見隣人死不能殮公憫之脫子珥飾市棺濟之有貸財不能償者輒焚其券嘗有所識貧病為市藥予之時懷錢陰付其家為調攝費不使病者知後病者覺感激嗚咽又嘗遇人河側置所賣入浴浴罷賣為人竊去乃他人物也懼不能償泣欲投溺公問其賣幾何為解囊金如數與之遂解其溺其人感

悅而去又嘗造屋隣家有病者來告曰脊衝吾家病因
所致公即為解造家人難之曰業已成矣奚改為公不
答已而病者相繼死始來謝罪其長厚多類此時置米
及錢戶側遇丐者及門輒分與之一日不與即不樂也
丐有受惠多者恥復經公之門如路有病行并有病汲
者皆為出貲甃砌尚義之心如一日尤矜物命飲食未
嘗妄殺見籠禽鳥必買放之篤於教子以雍秀敏遣遊
京庠督厲其學雍果有成舉進士為兵部主事以最績

進階承德郎天順甲申朝廷推恩封公如雍官身雖顯
榮不踰素履德積益懋郡大夫禮重之每鄉飲必延為
上賓公儀容秀偉美鬚髯閑于禮度揖讓有容觀者忻
羨成化壬辰六月二十九日以疾卒享年七十有七生
於洪武丙子五月五日公平生蠲潔好脩心地坦易絕
無城府處事一以道義交朋友誠信和洽克全終始未
嘗吐剛茹柔鄉黨中稱公厚德者無間言故卒之日人
皆哀之曰善人已矣配張氏有淑德克內相以成家封

安人子男五雍熙泰和皞雍今為閩藩左叅議有廉能
名泰皞早卒女三適沈銘唐良杜元吉皆士族孫男二
禮裕孫女二長適翰林院編修倪岳次幼雍奔喪歸卜
以是年十一月二十八日葬公於江寧鳳東鄉連城橋
側櫟山之原自述狀屬謙為墓銘謙辱公愛甚厚公有
疾謙時往問候疾革語謙曰以後事累子言猶在耳痛
哉銘謙固宜為念公德善愧筆弱不能盡發其懿然知
公者無踰謙又公命也其奚敢辭乃撮其槩為銘銘曰

公本宦族有聞於吳以材藝舉始居南都出入尚方承
事靡忒上下服欽匪材伊德古者鄉教六行為先公罔
不有天性則然孝友於家睦婣於族任卹於鄉久而彌
篤履仁蹈義康莊是從漢之長者周之可封教子登庸
榮養有祿恩錫自天煌煌命服為善納祐天報孔昭公
不自有其心囂囂秩秩賓筵肅肅禮度儀觀偉然見者
興慕櫟山之壤為公樂丘公所自卜溘然長休度德與
年庶亦無憾遺惠在人懷思永嘆流慶之原來其繩繩

其盛無替將誰與京嗚呼善人其藏在此昭譽無窮死而不死

蔣務本先生墓誌銘

先生諱主孝姓蔣氏人以其所居齋名稱之曰務本先生自號樵林居士其先魏州人五世祖安中金國子助教以直諫不聽棄官隱居揚州之儀真明醫道以傳子孫高祖埜山處士曾祖靜隱公元揚州路醫學教授祖伯雖元進士入國朝用薦為翰林修撰辭以疾出為

陽丞考用文徙居句容龍潭妣王氏用文累官太醫院判遂家南京以文學德行歷事三朝卒贈院使謚恭靖恭靖生四子長主善太醫院使次主敏次即先生次主忠先生世其家學以儒醫鳴凡抱奇疾莫能識者經先生胗視無不愈急於求人求輒赴雖雪夜炎天不辭而亦不責其報有疾之家必以先生為歸活人不可勝紀先生性敏質淳好學不倦博通儒書故於醫為精以內經乃先秦以上之文辭理古奧疏其義以示學者或

勸之仕曰仕者將行道以濟時也非吾所能吾雖業醫
庶德可以濟人奚必仕為喜吟詠祖杜少陵虞邵菴氣
邁神壯每酒酣輒誦楊鐵叢八陳圖斬蛇劍二賦擊缶
為節以自適正統初與蘇雪溪劉草窗沈崆峒王金粟
及弟主忠結為詩社後諸公淪謝復與賀存誠張友菊
諸君子相唱和所著有務本齋詩卷及樵林摘稿若干
卷藏于家愛臨古帖得李邕趙孟頫筆意尤精鑒古凡
彝鼎圖書皆能別其時代久近真贋多蓄為玩而亦不

留意焉篤於友愛上事兄姊下撫子姪曲盡恩情家庭之間怡怡如也理家惟尚質素男婚女嫁悉有定規墳塋祭器無不周備房幃整潔絕無華飾曰我等不畊蠶而得飽煖可不為天地節無益之費乎至遇孤貧則周恤無所惜沐其恩者甚衆襟度洒落於月夕必焚香鼓琴作文王楚歌之曲一再行音韻激烈聞者感愴自製有樵林操人多傳習之子誼有異姿年少能文章先生訓使先本後末曰本不立文雖工不取也後誼舉進士

授杭州府推官貽書戒之以儉曰不儉則不能廉試看
貪官皆由不儉故也又曰昔范文正韓魏公趙清獻呂
夷簡皆嘗為是官盡心刑獄後皆以名節顯汝宜效之
故誼居官有廉能名成化壬辰八月十四日以疾卒享
年七十有六生於洪武丁丑三月十五日配史氏獨醉
公瑾先生女子二曰論次即誼女一適浙江按察司僉
事吳璘孫一紳誼等卜以是年月日葬先生於都南城
鄉祖塋條述世系行實來請銘其墓嗚呼先生之清材

碩學淳德雅度當於古人中求之今不可得矣則夫表
幽潛以垂世範其奚可辭謹據所述叙次之繼之以銘
銘曰

溫其如玉兮厥德孔脩卓乎物表兮先民之仇彼有位
兮澤或不流嗟先生兮繫人戚休先生去兮孰恃孰求
後車過兮尚有式於茲丘

通議大夫南京戶部右侍郎黃公墓誌銘

成化癸巳二月二十四日南京戶部右侍郎黃公以疾

終于位南京吏部尚書廣宗崔公與公舊嘗聯官相知甚深既為經紀其喪復狀其爵里行實命其子謙以誌文為屬將扶柩還閩洎年月日葬於其鄉獅子峯之原而納諸墓予與公同進士舉至是蓋三十有餘年矣辱公愛厚而哀公之逝誌也固宜其敢以蕪陋辭黃氏世為閩之延平將樂人九世祖伯固舉宋進士授建昌尉累官四川安撫制置使兵部侍郎卒贈少師謚忠簡八世祖謙舉進士授通奉大夫自通奉以下俱隱居不仕

至公始顯曾祖德字子實妣傅氏祖貴字彥高妣楊氏
考崇字宗允妣蕭氏以公貴贈祖考皆通議大夫南京
戶部右侍郎祖妣妣皆淑人公諱琛字廷獻生而聰敏
過人博學強記善屬文尤長於詩宣德壬子年二十中
福建鄉試卒業南京太學月試常居前列祭酒陳先生
深禮重之正統己未中禮部會試廷試賜進士出身授
戶部四川司主事陞本部貴州司員外郎山東司郎中
景泰癸酉陞江西左叅政尋陞左布政使丁母淑人憂

服闋改浙江左布政使在任幾一月陞南京戶部右侍郎仍食從三品祿三載秩滿將入奏績入朝俄奉勅巡四川賜誥進公階以其官封贈二代及妻出巡幾二年召還然以高年勞王事精神漸衰猶力疾事事不懈是日自部歸覺體重不佳至夜不起公卿大夫聞之驚愕曰天何為奪公之速哉皆吊哭盡哀公之在戶部也時尚書淮陰金公濂號知人妙揀僚屬一時所得皆天下之選公在稠人中尤耿介有為最為所器重嘗檄監商

舶稅於揚州督輸芻束於天津八衛及河南諸郡清理糧儲於蘇松等郡所至皆赫赫有能聲在蘇松尤著蘇松自工部尚書廬陵周文襄公奉勅巡撫得便宜行事所在公庾積有餘粟凡有興作輒以取給費出無經豪民猾胥因而得為姦利部使者往往為威富所斂不能根究公至稽覈嚴明搜抉私隱一裁之以法無毫髮寬假豪猾憚懾宿弊以蠲時論韙之其在江西也有姦民數百輩嘯聚贛州山谷間剽劫為民患公直抵賊巢擒

其首惡數人置諸法餘悉不問盜遂屏息公歷官中外
年力精強有志事功於民情吏病靡不究悉以嚴察見
稱人不能欺及長戶部也庶務雖劇乃更御以寬簡凡
事總其大綱餘悉責成所司吏或有撓於公輒不貸也
論者以為得大臣體其巡四川也兵荒之餘民甚凋弊
公所至布宣上德問民疾苦考察官吏失得興利除害
旌賢善黜不肖不憚險遠跋履山川雖偏州僻邑賑卹
撫綏無不周歷由是政令一新民用安裕公為人性樸

厚坦易內無城府外無矯飾與人交一以忠信言溫而氣和遇事剛決則毅然不可犯持身廉潔服御儉約衣無華靡食無兼味出入敝輿羸僕所居廳事僅容旋馬與物無競同官尚書鳳陽陳公俊至無室廬公即他徙以所居讓之好施與僚屬有被誣之京貧不能行者即以白金若干兩助行喜接賓客言論欵洽忘其勢分有不知官資之崇貴也其平生立心行己真率負義氣類若此卒年六十有一生於永樂癸巳十月二十日配陳

氏屢封至淑人無出側室李氏生子三人長即謙國子
生次讓早卒次謹女一人未聘銘曰

閩山之英劒氣之靈挺生我公為時巨卿先世有聞遠
自忠簡公襲其芳亦以儒顯侃侃居位經國如家出藩
入輔聲績懋嘉周宣帝仁遑遑靡及公也躬瘁而民則
逸靖共匪懈夙夜在公一德終始惟懷朴忠其心休休
其介如石蹈素履夷噫孰與匹方隆倚注弼是仔肩曷
不慙遺俾也命延哀訃上聞卹葬有制我作銘詩永聞

于世

儒士蕭先生墓誌銘

先生諱瑄字廷璧姓蕭氏其先江右廬陵人洪武間徙閩右來京師遂移籍江寧縣今為江寧人曾祖文興祖父富考學讓妣王氏生子三人伯琦仲即先生季瓚皆能世其家而先生資稟尤異聰悟不凡學讓甫不授以他業惟遣從明師習舉進士業學既成三舉經明不就三試京闈不偶開門授徒從游者雲集多所造就先生

事親孝處兄弟友愛甚篤家庭之間雍雍如也與人交
不立町畦坦坦和易縉紳大夫聞其賢多願與之交長
者車轍日交集其門先生材高識卓通達當世之務長
於料事每論成敗得失後皆如所言故人有疑不能決
窒不能行者多就質焉先生為之剖析開明固不切當
退皆信服敬慕之雖屢為場屋所抑然用世之志未嘗
少衰嘗曰使予得効一官必能粗舉職業不在人後志
不克遂奈何先生身居畎畝而心恒憂國愛民間中嘗

條陳時政十數事幾萬餘言以在草萊不果上然頗傳
誦於人守備南京總兵官成國朱公雅好賢重士聞之
亟遣人禮致先生先生往拜之公一見驩若平生恨相
見之晚時餽遺於其家其為人所重如此先生雖不仕
而教授於鄉足以自得良時勝日與文人墨客遊名山
興壤賡唱迭和適意斯文足以自樂習次洒然畧無所
係累也今年盛暑中先生偶得微疾猶能與人對奕然
醫者誤視連下之遂至亡陽而歿實成化癸巳六月八

日也聞者靡不驚悼曰先生所至未易量也而遽止於此何耶皆痛哭惋惜之享年四十有九生於洪熙乙巳九月一日先生無子兄琦為治其喪以是月十三日葬安德鄉大井村先生與予素所知厚而墓上之石雖不忍銘然非予孰當銘者適琦以中書舍人羅仲祥所述事狀來請遂銜哀而為之銘銘曰

文行蔚然為時名儒車可致遠柩於通衢養高林泉以道自娛雖隱其跡迺顯其譽璞碎乎玉淵墮乎珠咎將

誰執非命也歟百身莫贖扼腕鬱紆勿怨勿尤以慰幽壚

勅贈承德郎南京工部主事吳公改葬墓誌銘

南京工部屯田主事吳瑄元玉未第時先君子以成化改元乙酉歲三月十五日卒于京師葬崇文關七里鋪東臯村之原翰林學士丘先生為銘誌其墓蓋十年矣歲甲午元玉獻績赴京念親越在異土乃起櫬遷歸南京改卜地於安德門外石子岡賈家山之原擇是歲十

月某日葬焉乃自為狀復求予銘誌之按公諱達字道通姓吳氏別號思菴吳江人吳之得姓原於泰伯吳江之吳則其故國遺胤也自高祖壽七而上世遠譜逸莫可考壽七遭元季亂諸昆散亡獨與兄壽六存世平收復遺業惟餘耕牛一金蟾一乃析以居壽七取耕牛以金蟾遜兄鄉人咲其呆遂稱為呆宅壽六為蝦蟆宅壽六子姓洪武初謫滇南在吳江者猶盛壽七生榮一榮一生真一真一生彥銘則思菴之曾祖祖考也榮一有

巧思嘗觀梓人造梵刹悉能諳其榘度隣有顯忠寺將建榮一謂僧曰吾能為爾建之僧殊未信及召集羣工示以成規果致結構堅美業梓者咸忌之榮一卒時取閭右實京師衆梓遂以真一舉因移籍上元家於金陵思菴早喪母周甫八歲又喪父育於繼母周比長精書數傳世業以高藝聞永樂初執役於尚方尋扈蹕北上洪熙改元奉命還南京營繕弗果正統初復召北上占籍順天之大興時初建府部百司公署當道俾敦匠事

掄材度工審曲面勢盛極精當績成勞勩居多同儕銜
求者多得授官思菴獨退巽不伐恥於干進而天性直
易樂善好施遇人之疾厄艱窘及貧無棺具衣衾者雖
家無贏貲必極力以濟強為之備間以自已所置送終
之具與之居東有長渠橋圯獨力為之以至修井甃路
皆助其成以便行汲所部工有老疾者援例白當道釋之
或持物來謝固却而去平日讀書知大義嘗舉古人言
行之善者與人言亹亹不倦以子理聰穎遣從明師講

學資給不乏嘗謂之曰吾家蝦蟇派有登元進士者入國朝不仕年百六歲卒吾派有祖姑嘗許歸鄉之士人未行而士人卒者誓不再適以終其身吾家世尚節義爾當勉於忠孝勤學厲行以無墜先緒可也天順己卯理中順天府鄉試會試辭乙榜不就期中進士以為親榮而思菴下世矣惜哉逾五年己丑理始中進士拜前職以績最受勅贈思菴為承德郎南京工部主事配連封太安人子男一即理女一適儒士張璵孫男二襄宸

孫女二長適周經次幼瑄告予曰先君蘊德器於身而
不及施晦跡衆技中而世固知不肖既得祿為養而竟
不待使又不得歸葬故鄉何痛如之故茲改圖望先生
矜而賜之銘以伸不肖之心使先君子雖無聞於今庶
有聞於後此則先君子之幸而不肖之志也予聞其言
而哀之畀之以銘曰

君子之心求盡在已得喪之途不為戚喜嗟嗟思菴德
厚才良所見試者德藝之長度能第功孰出其右彼躡

取榮我獨退守樂天安分歛晦不施力之所及見義必
為所取者廉所遺則腆有子奮庸日躋貴顯一世之短
為報實長褒贈幽壤沒世有光首丘故山孝子之志我
銘其藏因詔來嗣

中都留守司正留守徐公墓誌銘

公諱顯隆字文盛徐其姓也世家鳳陽曾祖諱達從太
祖起兵平定天下為開國元勳封魏國公追封中山武
寧王祖諱膺緒驃騎將軍中軍都督府都督僉事考諱

景弼左軍都督府都督僉事曾祖妣孫封中山王夫人
祖妣朱妣毛皆封贈夫人公安容秀朗舉止詳慎雖生
貴族而克知嚮學馴雅溫恭無驕蹇之態年二十二襲
授府軍右衛指揮僉事處事勤敏綽有政聲守備南京
豐城侯李公賢深器重之委總教場操練軍馬嚴約束
精訓習號令明信士皆畏服修舉廢墜聲威振起天順
丁丑協同守備鎮遠侯顧公興祖薦之於朝言其知識
超卓武藝精熟莅事公勤律身廉介乞加獎厲詔調南

京錦衣衛治事錦衣典朝廷禁旅職任親密公剽理繁劇善於裁決無不允當材能益著成化庚寅中都留守司留守缺負詔兵部推選兵部以公應詔遂擢公署正留守事留都所統八衛吏牘民詞日填委於案公剖理無滯境宇晏然屬時亢旱公率所屬官吏父老齋沐致禱於城隍神祠雨澤隨澍遠近霑足遇秋穀不登民乏食公憫之為請於朝田租悉皆蠲免民德其惠朝廷眷待專重凡祭告皇陵必命公行事公感上知遇夙夜寅

畏竭忠圖報奈何底蘊未及盡展而體玉微和遽感風疾即具疏乞閒詔仍回原衛撥醫治療回南京未幾竟以是疾卒於大功坊第實成化甲午十一月二十七日也享年五十有二生於永樂癸卯二月二十四日配唐氏龍江右衛指揮彬之女有淑德執婦道子男二鐸襲南京錦衣衛指揮僉事娶濟川衛陳指揮女繼娶武安侯鄭公姪女鉞授承仕郎娶鷹揚衛胡指揮女孫男一世恩孫女三長適本衛千戶劉壽餘幼鐸等卜以是年十二

月二十一日祔葬公於祖塋奉進士陶元素所述行實
來請銘為之銘曰

惟我皇祖龍飛濠梁曰有魏國同起帝鄉奉命徂征所
至必克四海削平功居第一上公錫爵加以王封河山
帶礪垂裕無窮曰子曰孫繼居督府赫赫元勲奮揚厥
武篤生我公英毅出羣長嗣父職官居府軍乃登帥壇
總師教練乃陟錦衣公勤無倦留都缺守簡命往充案無
留牘訟簡囹圄空雨澤愆期有禱輒應奏免田租以全民

命在官數年惠政實多所施未究歸歟養疴嗟公之生
王門威眈與國匹休世承貴顯公德之懿寬厚溫純不
驕不縱服義懷仁公行之良尊禮儒碩持盈守謙動循
矩則國方倚任何遽云萎遺愛在人其誰不思鬱鬱橋
陵公祖陪葬公祔於茲我為銘壙

旌表孝行龐公墓誌銘

公諱景華字宇春別號松雲世為吳之松陵人曾祖積
之祖昇甫父彥恭俱有隱德洪武間以產殷徙京師占

籍應天今為上元人居長安街西彥恭號安分平生行履見侍御金公庠所撰墓誌母吳氏有懿德公幼有至性彥恭歿方九齡即知哀毀母孀居守節慈訓有方屏膏沐躬儉素粥簪珥以市書籍遣公就學里塾歸則課其所業公佩慈訓力學不懈人以為非是母無是子也比長為娶婦徐氏服從姑命勤於紡績織紉家因以饒孝養豐腆母心安且樂焉宣德戊辰母嘗得疾陷危公湯藥必親嘗夜則稽顙北辰以禱差而復作乃割股為

糜以進疾果瘳又嘗作痢刳股如初復嘗糞甜苦謂其妻曰糞苦母不死矣果復瘳嘗至龍潭江澣時大風舟多覆見有溺水起附舟底者十六人公即捐金購人駕舟往救之賴以全活又丹陽道上有井夜行不知者多失墜公見而病之為命工鑿石為欄以護其拯濟多類此天順戊寅春隣火熾近所居乃籲天曰吾母老矣願天留此終餘年頃之風反火息人皆以為孝感所致母壽九十餘有司以其事聞天順己卯詔旌其門曰孝行

復其家丁役成化初纂修實錄嘗采其行跡以進母至九十有三而終公號慟痛絕衣衾棺殮悉合於禮太史安成彭先生為銘其墓葬鳳臺門外安德鄉王家山之原與父合窆遂廬墓側朝夕哭奠有強盜十餘人欲發其墓聞其哭聲曰此孝子也遂各遁去有慈鳥集於松柏靈芝產於階砌搢紳多為詩文美之成化丁亥府尹王公弼江寧丞廖公世清欲舉其孝廉不果乃以賓禮請預鄉飲鄉人墓之成化乙未二月二十六日以疾卒

卒時取紙筆述身後事以遺諸子享年六十有五生於
永樂辛卯三月十五日配徐氏有貞行克勤內助子男
四極娶張氏撫娶朱氏撫卒朱守節拱娶梅氏掄娶王
氏掄以儒士薦供事南京禮部將授以官孫男一祐孫
女三長適陳某餘在室諸子卜以是年三月十六日舉
柩祔葬祖塋奉禮部印局使張懲所述行實來請銘嗚
呼人之行莫大於孝景華孝於親者如是其於子道盡
矣是宜朝廷旌之為世勸也可無銘乎銘曰

生事葬祭事親終始孰能盡之曰龐孝子嗟嗟孝子發
於一誠病不惜軀葬則守塋謂天莫親乃息延燎謂人
叵測乃止強暴烏棲芝茁瑞應畢臻拯危濟難孰非此
仁至行上聞有詔旌表雙桓在門予以勸孝嗟殞其壽
不殞其名曾閔雖往公襲其馨玉山之藏既安且固過
者式之孝子之墓

陳御史母太孺人徐氏墓誌銘

成化十一年乙未六月二十五日南京陝西道監察御

史山陰陳直夫喪其母太孺人徐氏於官舍先是成化丁亥直夫以公事赴京復命未歸而先考居蘭處士卒弗及親殮痛恨罔極今又以考滿赴京太孺人適七十且受封七月七日其初度直夫亟歸將為壽而太孺人已病直夫獲侍湯藥日增劇竟卒哀哉所幸者得親棺殮歸稍遲則又抱處士之憂矣茲將扶柩歸山陰啓處士窆合葬於黃龍尖山之原奉南京工部吳貲外元玉所述狀來請銘直夫少從予遊有舊好嘗升堂拜母予

固當銘按徐諱某其先真定人父得中任杭州右衛百戶太孺人年十四歸處士今贈文林郎監察御史處士娶未數月代父戍交趾時交趾不庭道梗遂止寓廣西梧州北流太孺人日躬紡績以給後處士召還乃隨居京師家益落太孺人佐以勤儉得弗墜處士性剛方與人寡合雖齟齬於時卒無一事罹法網者皆太孺人有以相之也處士夙喪母事繼母盡孝養母憚京師苦寒將挈所生兒輩還杭自便留弗從太孺人罄簪珥服飾

之積以資其行直夫奉太孺人扶處士柩歸葬時母尚在
未幾亦卒太孺人連遭大故易戚兼至又具棺殮葬兄
喪之不能舉者平生惟簡靜寡言咲不好華飾無故不
踰中域閨庭肅然宗鄙婦女相觀而化者為多家無贏
貲而好濟人之急蓋其心所樂也祀事之供必蠲潔親
賓之御必豐腆季子直夫少穎異處士俾就學直夫亦
克奮厲所與賢人君子過其家必親治具以延款之處
士弟早喪所遺兒女教育婚嫁無異已出直夫既拜官

每諭之曰吾幸已見汝成名矣汝宜檢身心持清白毋
怙勢作威以古人之風績自期庶能常保此名以光汝
祖汝父於地下吾受汝養心亦少樂吾雖無瞿母之賢
汝可不以方進自勉乎直夫所以侃侃自立不徇流俗
者皆太孺人有以教之也太孺人生於永樂丙戌閏七月
七日享年七十子三人女一人長子曰雄早世娶董氏
守節二十餘年終於家生女二朱欽莊晏其婿也次曰
勇娶楊氏生女一尚幼次曰壯即直夫娶章氏繼徐氏

贈封皆孺人生男一曰忠女嫁錦衣千戶王福銘曰

嗟太孺人安於固窮相夫令終教子奮庸婦道母儀懿
德兼隆封勅之華祿養之豐易約為泰不知在躬訓厲
之切惟孝與忠惟慶之積源泉日東從夫龍山同掩幽
宮過車宜式賢母之封

明故奉政大夫修正庶尹荊府長史司右長史孫
公墓誌銘

公諱本字仲立先世浙之錢唐人大父仁父榮皆有隱

德洪武中以賢殷徙實京師遂為上元人公生而姿容
俊雅性敏悟蚤喪父事母盡孝有司以俊秀選入京庠
問學懇篤經書子史靡不研究尤長治易嘗構一軒軒
外植梅因號梅窗讀易別號養正取易蒙卦義也學者
多從之遊宣德乙卯登鄉選明年中春官貳榜授閩之
武平縣學訓導喪母扶柩歸山路崎嶇備嘗險阻竟抵
先壠以葬起復改教浙之嚴庠勤於啟迪各因人材高
下以施教士子多所成就秩滿擢湖之安鄉教諭一以

嚴之教法教人賴其甄陶出而効用於時者為多景泰
癸酉東廣秋試藩臬聞其學行聘主文衡一本至公去
取允當號稱得人秩再滿擢荊府右長史公慎勤密夙
夜匪解責難陳善獻可替否裨益良多歷事兩王深蒙
眷顧善處僚屬咸相敬讓撫卹軍校莫不感悅在藩府
一十七載人皆稱曰賢相焉嘗蒙恩典錫以誥命贈考
如公官贈妣封妻皆宜人公自以位既通顯年復衰累
章乞致仕王不許成化己未冬命使於京師舟還在途

忽邁疾子大有侍行至儀真遂卒實七月十日也訃聞
王深震悼數為墮淚累遣官賜祭恩禮隆厚享年七十
有三生於永樂癸未二月二日子一即大有恩授七品
義官女二長適南京工部郎中潘傑次適嚴州守禦所
千戶趙瑛卒孫女四長適蘄州庠生陳大經餘俱幼公
為人學博行醇心平氣和持身以禮接人以恕平日於
貨利淡無所好惟好蓄書籍累千數百卷不已喜吟詠
操觚染翰吟風弄月出人意表每過佳音良朋宴樂則

浩歌以自適。曾中洒如也。其在嚴陵有居。諸集安鄉有
呵硯集。蘄陽有仕學稿。藏于家。公樂蘄陽風土。嘗卜其
地。大原里木麻保之原。以為壽藏。今大有將舉柩。葬於
是。而傑為之壻。今年省公於蘄。適公有北使之行。擬待
公回而遽爾永訣。乃述公行實。請予銘。以誌於墓。予與
公少同硯席。薰公德誼有素。自涉宦途。會面無幾。今則
不可復見矣。感念疇昔。則墓上之石。固所當銘也。乃為
之銘。銘曰

操行端介謹步趨學窮彖畫味道腴抗顏師席為世模
輔導藩王忠蓋輸名與董賈可並驅坦然方寸恬以愉
斯其允為君子儒青山是處可寄居勒銘貞石永不渝
中議大夫贊治尹建寧府知府浦公墓誌銘

公諱鏞字廷用姓浦氏先世蘇之長洲人考諱浩原館
甥於金陵蔣文德家遂為金陵人蔣卒再娶毛氏生公
穎敏端重不事遊嬉長補應天府學生讀易有造詣為
文典實詳雅為同儕所敬讓領景泰庚午鄉薦登甲戌

進士第拜南京山東道監察御史公忠信明決樂易廉
謹動循憲度都憲河南軒公古曹李公皆重之有疑獄
必命公讞公不事姑息不憚權勢有知縣某受賂民訟
之持刑者欲出之公覈實其事必寘于法不少貸有守
備內官欲用官舟同事者倍與之公減數內官邀公會
公曰吾為御史知執法耳奚會為卒不往三年績最推
恩封父如其官母蔣毛室周倪俱孺人尋丁外艱服闋
改南京廣西道理鹽法田土及各衛馬冊等務皆得其

當衆皆悅服巡視鳳陽倉糧去姦懲貪抑強植弱辦理
寃抑風聲凜然歷任幾九載威德兼著戊子陞福建建
寧府知府公興學校課農桑正風俗一郡大治庚寅歲
饑民有掠食者上司捕之公曰皆吾赤子也毋庸捕即
加賑卹民皆感悅屯軍有欠稅糧者將鬻妻女以償公
為損已俸償之夫婦感泣乙未考績北上同寅以公用
白銀數錠為贖公使糴穀以賑民饑却不受公廉公仁
恕多此類明年還治民皆欣悅以為得蒙終惠不數日

疾作皆奔走祈禱竟不起時成化丙申八月四日也距
生永樂己亥正月廿八日春秋五十有八先娶周氏繼
倪氏生子三長禎娶姜氏次祥卒次祺聘潘氏女適士
族顧讓孫男一瑄女二幼茲者喪自閩還卜以明年月
日葬公江寧新亭鄉徐墓村先塋之次其子禎等哀經踴
門奉工部主事建安龔沆所述事狀來請銘予與公同
遊京庠知公實深公問學淵弘善書能詩操行端確平
生所著有公退稿若干卷以公之材器抱負正宜為時

大用以展布底蘊而僅止於是甚可惜也予也奚忍銘
公之墓哉雖然使予不銘則無以傳於後而信諸遠也
遂不辭拭淚為序而銘之銘曰

驂騮綠耳騁乎康莊龍泉泰阿聚其鋒鉞材器健利公
也可方我我豸冠曰范曰張翩翩五馬曰龔曰黃遠大
是期賁志莫償嗟徐墓原有封若堂流澤之遠俾熾俾
昌

倪文僖集卷二十九

欽定四庫全書

倪文僖集卷三十

明 倪謙 撰

傳

通判嚴公傳

公姓嚴氏紹興餘姚人也諱誠字可誠性敏嗜學授業於鄉先生庸菴宋公之門為入室弟子公長鬚秀眉儀度詳雅占外可知其內嘗詣邑倉納米為叅政羅公所

奇留承事藩省公惓惓以父兄早世而身係母與外姑之養辭叅政曰君子抱道於己以見世也得祿為養以成孝也曷庸辭公度弗可違乃就隨事効勞無纖芥稽慢藩長貳嘉其恭慎咸以遠大期之事竟謁選得播州驛丞時外姑已歿奉母之任公善承順顏色母安其孝不知道之險遠也未幾母終於播舁櫬歸葬服闋調丞雍丘滿陟涑水巡檢獲造偽章者三人擢北京中兵馬副指揮發摘姦伏寇竊聞風斂跡改丞上元邑實村民被

劫民與隣村有隙因誣其為盜繫獄公至察知其枉辯
出者一十八人咸扣額曰活我者公也都憲李公採木
徽州郡檄公率徒二千往役拊綏得宜逮終役徒無逸
者都憲勞之曰使董役皆若嚴丞何事不濟嘗督官粟
抵清源入倉主者要賂公不聽怒欲譴公公以事理面
折之其人媿而止朝廷嘉公政有成績賜勅贈父宣義
郎上元縣丞母孺人室孟亦受封公感激曰吾無以報
君上也滿秩請老於朝不許陟安慶通判郡有余忠宣

公廟歲久剝陟頽敗公謁祠下慨然曰表忠節以厲民
守令職也即命工葺之并鏤補其文集刻板以傳屬邑
懷寧學舊無文廟立為初建以疾卒於官年七十有一
公為人和厚易直行端方敦信義在上元時與長干僧
月山交善常以白金寓公所僧病且革公具以還僧曰
吾無可托以後事累公僧卒公備為治喪葬餘物付其
弟子知覺公明敏有才局性惡狡獪而卹良善故當兵
邇則以嚴察舉職居牧民則以豈弟著聲急所先務達

為政大體視財利泊如也有三子曰肅威方嘗誨之曰
吾歷官四十年惠澤皆歸於民所餘者惟約素耳吾無
所遺以清白遺爾輩爾惟勉之肅克樹厥家威今卒方
攻儒業負器識起紹先烈為儀真駟丞太史氏曰公始
以力學養親為志固無意於世也一旦遭時賢汲引幡
然効用展其材智卒致仁愛結於民名聲昭于時恩榮
及其親有古循吏之風焉偉矣哉故為傳之以聞于後

忠義子傳

忠義子名鍾姓張氏滁州金牛墩人也父瑀任山西行都司都指揮使生四男鍾其仲也居家孝謹習孫吳兵法慷慨有志畧膂力絕倫善騎射正統己巳北兵擾大同總兵官定襄伯郭公登召募敢勇士以充先鋒鍾年十八仗劍詣軍門應募定襄見其驍雄英邁甚奇之曰薛仁貴岳鵬舉之流也即留寘帳下有警即率以殺賊景泰初元庚午正月從定襄出塞遇敵沙窩先登陷陣奮不顧身敵奔潰生禽其首諾海齊等獲其車馬什器

及奪回被掠人口三月敵臨大同駐城北陽和坡從總
兵官武清侯石公亨出城擊之敵敗走追北至石佛寺
等處生擒其酋呼察等而還四月復從武清赴京率遊
兵前哨行至沙河村遇敵三路入寇偕父及叔瑄兄鉞
將兵五百人與敵接戰敵衆四集縱擊我軍我軍不利
皆退走止遺鍾父子四人鍾恃勇躍馬衝入敵陣引滿
左右射無不應絃而斃敵衆披靡俄所乘馬中矢仆鍾
墜地乃舍馬步射殺百數十人矢盡遂為敵所圍敵憤

其勇拔刀斫去其左手曰汝復能射否鍾猶用右手揮石以擊之敵益憤劃其手指盡開身被十七創瑞調兵復戰敵引卻乃載鍾回大同道路之人見其痛楚無不涕下霑襟翌日創甚而卒時是月二十四日也得年十九葬之城東王霸村原城守總戎以及大小文武士咸扼腕悼惜廣靈親藩哀傷其志親御翰墨篆書忠義二大字以賜復為詩挽之大夫士從而歌詠之者甚衆初沙窩石佛寺之捷兩上其功詔兩陞鍾為大同右衛所

鎮撫比報下而鍾已沒至是定襄復上其死節之事詔
憫之陞鍾百戶鍾無子今以弟鎮繼其職尋積其功定
陞正千戶云史官曰謙承乏詞垣日凡天下忠烈貞義
盛德大節足以厲世範俗者皆執筆論議具載國史若
鍾者毓德將門盡瘁王事遇敵愾而不懼蹈白刃而不
卹忠義凜然千載猶有生氣使玉其成功業之懋必偉
然為世名將矣不幸銳氣方張遽遭折衄嗚呼其可使
之無傳哉用是特為著之以備采錄詩不云乎彼蒼者

天殲我良人可悲矣夫

茂國剛毅公傳

茂國剛毅公諱彬字質文姓李氏鳳陽定遠人曾祖福祖榮昭世篤德誼為鄉善士父信有材畧勇銳絕人從太祖皇帝起淮甸平定天下積功至明威將軍濟州衛指揮僉事洪武己巳以老謝事公代之時年二十九磊落有大志辛未率所部兵從穎國公征北番歷諾延雅克山追襲其酋昂吉寶哩至洮兒河身先士卒多所擒獲

復歷黑嶺寒山磨鍊海子及黑松林熊皮山追襲其首
烏梁海擒獲有加太宗皇帝居潛聞其驍雄召見與語
奇之遂隆眷注明年遣巡視宣府沿邊諸城起信為遼
東都司都指揮使癸酉遣相度宣府城基明年率兵築
之并築德勝口城乙亥又築萬全保安城明年征哨泥
河營黑松林至哈喇還駐兵廣昌己卯靖難兵舉公為
前鋒首率兵攻克薊州遵化進指揮同知繼攻克雄縣
漢州進都指揮僉事已而戰真定拔永平下大寧剋埧

上取廣昌明年鏐白溝攻濟南累樹奇勲進都指揮同
知其冬破滄州明年斫敵單橋擊衆藁城追奪順德畧
地定州勲績愈懋進五軍都督僉事冬戰楊村中傷上
亟遣醫療治賜藥物俾還北平公不自餒願力疾隨軍
自効上嘉其忠勇諭之曰卿其暫輟戎事之勞歸輔世
子居守壬午上渡江正位宸極命護中官至京念其勞
績居多癸未永樂改元定功行賞封奉天靖難推誠宣
力武臣特進榮祿大夫柱國同知右軍都督府事豐城

侯食祿一千石子孫世世承襲錫以誥券追封三代
自曾祖至父皆豐城侯曾祖母湛祖母王母張妻周皆
封侯夫人由是倚任益至甲申夏鎮守江西秋召還明
年送趙王赴北京還往捕阜君山寇丙戌南征交趾命
充左叅將有白金文綺之賜率師入境水陸夾攻直擣
賊巢禽獲魁黨俘獻于朝悉平其地戊子凱還加祿米
五百石尋命勦平東海倭寇明年總督操江尋往長河
禽賊李法良械京庚寅勦捕福建海寇頻年為國弭苗

除害耘鋤海內不避險難未嘗少息上深嘉獎錫予稠
疊一時將臣無與為匹壬辰佩征虜前將軍印命充總
兵官鎮守甘肅有白金文綺寶絁之賜至鎮振揚威武
邊塵清肅甲午召還扈蹕北征邊塞明年鎮守陝西丙
申召還扈蹕還京尋佩征夷將軍印命充總兵官鎮守
交趾在鎮七年遠人畏威懷德莫不帖伏境宇清謐壬
寅年六十二卒于位交人市為之罷相向號哭如喪所
親訃聞上震悼為輟一日視朝厚加賻贈勅有司歸其

喪遣官諭祭賜葬宛平縣西安里之原追封茂國公謚
剛毅加封三代祖考皆如公爵妣皆封夫人子賢嗣封
賢卒孫勇嗣太史曰天開一代之祥必於興王之地篤
生豪傑龍騰雲翥出佐景運共成王業若漢祖開基蕭
曹陵勃皆由豐沛以從光武中興鄧賈吳岑皆自南陽
而附策功錫爵為時虎臣非無意也我聖祖提三尺起
淮甸一時從龍而興者大抵皆濠梁之傑也積功累勲
率皆小隸化為公侯尚何異于古乎今觀茂國之父奮

跡濠梁既以勇畧從定天下致位閫帥而公繼之復從
義旗清內難豐功偉烈卓冠當時卒致生拜侯封歿進
公爵大國榮名上及三世非天實生之以為興王之佐
而何視漢豐沛南陽之豪不足多也公為人儀狀奇偉
襟度宏遠深沈果敢端靜有謀忠誠以事上恩信以服
下小心畏慎有功不伐有勞不矜用能深荷主知信用
日篤凡有大事輒以屬公咸克有濟信為一代之名將
矣公謝世已久子賢孫勇世爵相承一德惟肖皆典兵

柄有聲於時流慶之長於斯可見矣公之勲伐具載國
史然世之人或未之知也故為著之以補家乘之缺云
哀辭

八趣陸先生哀辭

冽彼甘泉兮涓涓其流山環水縈兮境深且幽中有隱
者兮巢與由淡無營兮焉求溘冷風以上征兮魂杳杳
其遠遊頰人寰以超忽兮遺小華亭之故丘石田兮雨
愁書榻兮陽收白鶴怨兮雲慘清露滴兮松樛烟竈不

午兮月亭已秋雪壓梅坡兮霜摧橘洲悵八趣之寂寞兮
懷斯人之好修鋤間之詠兮歸田之謳林壑收聲兮孰
唱孰酬瘞白壁於印墓埂之原兮風木颯其蕭颼予將
掬寒泉以為酒兮采秋鞠以為羞薦芳馨以一酌兮路
阻絕其無繇徒臨風而永慨兮託楚些以寫憂嗚呼有
子躋顯融而荷推封兮行寵賁乎天庥

肯綮李先哀辭

并序

先生地曹主事朝陽之父也得年七十有五而終于正

寢不可謂不壽然朝陽善於厥職朝廷方將賜勅以推
恩其親而先生之碩德雅度宜享其榮而遽爾即世此
朝陽之心所以致其痛憾而予與朝陽為同升亦不能
不為之永慨也於是乎哀之以辭辭曰

繫羲和之于邁兮杳一去而難追少者忽然壯兮老冉
冉其瀕衰睠往古以逮今兮孰長存而不死惟脩德以
全歸兮庶名稱於沒齒顧碩人之制行兮外聲利如浮
雲耽六籍以明道兮推所存而淑人善俯察以仰觀兮

入靈臺而應召曰慈顏之違養兮詩百篇以自悼羌以
老而辭祿兮竟拂衣以言歸喜鸞鳳之覽德兮翥舜廷
之羽儀封章指日以寵頒兮胡溘然而弗待樹欲靜而
風不停兮寧不致人之永慨餘耿耿之清操兮固百世
以揚芬衍綿綿之慶澤兮將裕流於後昆遠莫致乎生
芻兮徒前修之慕也托楚聲以寫哀兮惟令子之故也
噫

已山先生張公哀辭

并序

已山先生張公諱逸伯安其字也世居句容為右族曾
大父進甫大父仲明皆隱德弗耀父穀賓洪武初家園
嘗產嘉瓜一蒂駢實以獻太祖高皇帝親製贊以美之
命史臣宋濂為之頌人咸謂為善慶所鍾無何雪叔父
穀恭之枉於朝以寃死家徙崇山先生在行既而徙赤
水母歿於沅執喪哀毀年逾弱冠篤志問學聞白撒王
子立魏仲高素史李白祐河陽潘子安南平趙弼皆有
學行往與交游雖顛沛中講習弗厭叔父穀善嘗道病

危甚先生馳禱於天願減己壽延之病果愈篤于教子
遣子諫從明師游業成舉進士為監察御史以廉能稱
暮年思故土挈眷東歸弟伯啓滯留中道先生僑寓上
新河遲之越三暑矣景泰壬申以諫貴勅封文林郎福
建道監察御史諫得請歸省始克迎先生還鄉既還之
明年以疾卒蓋春秋八十有三矣臨卒猶命諸子釐秘
器為二以待弟其孝友蓋如此跡先生平素遇事必勇
於義持身必本於禮嘗單騎開諭羿蠻兵息變弭糜藥

食療征卒生死肉骨以至受王成遺孤之託資姚或寡
弟之生全敬一承宗之祀皆行誼之卓卓然者他未能
悉數也且喜吟詠不為苟作著家範以誡子孫終日危
坐如對大賓華靡之物不加於身非聖之書不接於目
高風雅範起人歆艷故先生之歸夷人號泣遮留遺庄
委舍無忍毀敗其盛德感人有可見矣先生卒君子因
所號稱之曰己山先生嗚呼詩稱綿綿瓜瓞以謂周人
之生先小而後大也況一蒂駢實豈非子孫蕃大之祥

乎然返遭顛踣疑若有兆無應今觀先生既徙復歸身
荷恩封享有壽考而子孫貴盛聚族同爨者八百餘指
是知祥瑞之臻示之於中微而告之以終吉固已默定
於先矣天道不爽豈不信哉謙先生郡人也與御史君
同年契好鄉歸省時嘗拜先生於江上獲瞻風采今幾
何時而遽聞即世寧不重謙之哀也耶乃為辭以抒余
哀辭曰

吁嗟已山三峯崑崙摩青冥堪輿敏秀蜿蜒旁礴元氣

凝丹砂石英名材奇產寧獨勝
篤生偉人魁梧傑特著
美稱耕道獵德詩書講貫務研精
好仁樂義若飢嗜食
渴飲水厄窮不戚安命順理困彌亨
雖在蠻陌忠信篤
敬亦可行既老而歸不忘厥初樂所生
封章褒錫命服
寵被承恩榮繫天報施處高聽卑信有徵
宜膺遐筭軌
世範俗瞻儀刑胡云一疾淹
幽景迅不我停首丘義
隴全歸得正沒以寧
緬懷高風矢辭不多寄哀情
吁嗟已
山終古仰止同垂名

祭文

祭施修撰宗銘文

曩予與君道里隔越名聞相接比聆聲欬聞棘始設是
締交之由肇也桂籍名濟鹿鳴宴開喁喁嘻嘻懽笑孔
諧是鄉薦之同領也多士仝集鏖戰未息予亦後君脫
穎而出是春試之同升也金榜題名禹門激浪聯騎道
周聽臚天上又黃甲之同登也冠佩輝煌寵恩浹洽通
籍金閨聯班瑣闥又玉堂之同任也然而稔數年之交

合四同之義則取友天下若予與君者果孰繼哉予以
姻事未畢別君遠去今式遄歸而君遽不穀疾不及視
棺不及斂痛裂肝肺曷其可贖惟君於德也修於學也
力使天假以年則成世鉅儒為時名臣不辱矣乃豐其
名而嗇其壽然則造物者噫何酷哉玉碎瓦全固君子
所為痛哭也韓子云生而不淑孰謂之壽死而不朽孰
謂其天然則君之死可謂不朽且淑矣靈將載途用返
故鄉勿震勿驚丘首是藏清酒是酌永訣于茲號咷慟

悼不知所辭嗚呼哀哉

祭兵部徐尚書文

晞

望重澄江位崇台輔名埒鄴侯量儕叔度始爲冬官焯
著才賢繼進郎署兵曹是遷簡在宸衷深蒙寵異命掌
司徒居根本地爰念舊勞曰遠匪宜尋召還朝益隆倚
毗蠡彼夷酋倣擾南紀師行薙平轉饋千里凱奏陛廷
聖席屢虛嘉厥丕績擢任尚書鸞詒推恩上及三代子
復有官才亦超邁光前裕後自古鮮儔富貴壽考厚德

之由霜露見侵移疾在告訃音忽聞罔不哀悼國凋元
老天不憖遺縉紳趨吊賁涕交頤矧託葭莩情慟尤切
敬酌一觴哀哉永訣

祭楊文定公文

溥

惟公學行端邃忠誠自然聖王之佐命世之賢早占鄉
闈繼登甲第豹蔚彪炳鸞停鵠峙編摩翰苑彤管是操
屢承顧問深沐寵褒擢正詞垣黼黻絲綸功在社稷澤
被生民掌帝之制聖心攸注尋遷太常用旌殊遇學士

再陞武英之殿尚書禮部益隆宸眷帷幄論道孤階特
承長庚爛若公輔以升一柱擎天獨公壽考天實憇遺
以殿諸老總裁國史名聞四朝經筵啓沃位冠百僚王
帶緋衣童顏鶴髮長養人材務勤簡拔凡百君子望公
無涯胡不萬年重我國家館舍忽捐千古永訣孰宣皇
猷疇補袞缺天子震悼卹贈倍常辱在侍從寧不盡傷
翰誠以辭公其歆止舉奠臨棺賁泪曷已

祭副都御史丁公文

璿

惟公氣鍾秀淑挺生金陵橫經庠序德譽早鳴齒方弱
冠膺薦以升春闈得雋策名俊英入承清問對揚明廷
六龍初馭圖治勵精公踐甲科燦然有聲拜官冬曹載
經載營惟職是盡顧禍乃嬰謫戍遠徼順受以行心志
筋骨勞苦曷勝實天玉汝增益未能詔求遺賢公首被
徵戕戕繡豸重沐寵榮發摘姦伏激濁揚清風威凜若
振國紀經麓川繹騷炎方靡寧公往按治備諭賊情歸
報天子赫怒整兵擢都憲臺公復就征王師壓境厥角

盡崩氛祲掃蕩凱還于京錫賚有加貳憲繼陞維彼貴
藩罔或不遵輯寧邦家雙鬢已星立朝侃侃縉紳
儀型忘身盡瘁為疾所縈上章歸政皇鑒厥誠投
老故鄉將保餘齡胡不憇遺大命以傾天喪斯文
國失老成士乏所仰民忘所憑某生公仁里挹公
德馨承訃告哀怛然神驚拊棺心裂拜像涕零江
東千里發紉有程恭致一奠爰達幽冥俎體匪克
籩實匪盈豈伊物腆情因以形公來格思勿昧爽

靈

歸杭祭祖塋文

某以不肖早事儒業發身科第獲仕朝著列職禁垣實
維先世積德累善慶餘所鍾爰念移家南京已六十禩
塋域荒涼越在故鄉久違祭掃引睇南望曷勝怵惕茲
幸得請言歸桑梓敬趨墓下芟治蕪穢增培舊封謹以
牲醴庶羞式陳奠獻嗚呼木必有本水必有源人之有
身厥由乎祖報本反始禮所由先伏惟尊靈體魄永託

萬年安固尚垂默佑庇我後人謹告

祭河南王副使文

鉉過武城時祭其墓

惟公學問談博器質穎異橫經序庠發身科第預皇上
簡拔之選登翰林清華之地藻思英發天章輝麗史館
編摩著述升班馬之堂經筵啓沃獻納挽程朱之轡抱
經綸有用之才負剛大不撓之氣朝野久振乎賢名緩
急足勝乎重寄嘗輟講而即戎蓋文事而武備爰擢貳
憲暫辭文陞大振風紀盡祛姦弊未彌月而施政輒闔

境而蒙利何嬰疾以難瘳遂出人之不意始傳聞而悸
心終得實而隕涕予茲任復朝端舟次河際悵蒼海之
珠沈顧黃壤之玉瘞清醕式陳微情攸繫于以見死生
之交于以伸僚友之義靈其格斯予亦行忌嗚呼哀哉

祭妻叔友聞姚公文

惟公器宇魁梧丰姿洒落誦詩讀書克事問學和以處
衆信以待人履道坦坦藹然陽春德為世重行足人法
薦書起公遂登師榻循循善誘啓沃實多教有義方子

躋賢科身將命官子將得祿情未一伸胡逝之速故鄉
何許委順於斯聞訃倏至曷勝痛悲匪物之豐惟情之
切一奠寫哀繼以嗚咽

祭劉狀元文

儼

昔公挾其所得掉鞅文場早有聲於鄉解乃復藏修於
家而多士從游已如衆山之宗岱是以一出而遂睟天
下臨軒之策見其學術光明而正大既入官翰林大放
厥辭議論數陳則又瑰奇而古怪蓋由其材之蘊於已

者明敏而氣之得於天者豪邁故每纂述為副總裁則
刪定筆削繁簡適中而是非不貸嘗主典夫文衡去取
惟公而世家被黜者反交章而見害卒之邪不能干正
志不少挫而廷議克伸聖明是賴果使用盡其才也則
可為士之槩獲國之著蔡奈何英魂杳邈遽爾翛然而
壽不登於耆艾卹典是褒謚加文介禮實異乎常僚恩
蓋逢於希代靈輒戒途警歎如在聊寓情於一觴重吾
儕之永慨

祭劉秋官文

玠

功名事業貴全始終中道毀折祇係其逢當正統初甲
科高擢學有家傳深探筆削牛刀小試出宰於莆獨承
旌異德化以孚大比京闈入司文柄藻鑑精明得士為
盛尋進乃職馭於秋曹嘉績維懋復膺寵褒才優行端
著聞有素白璧青蠅乃罹墨誤迨迨遼海駕言東征安
分樂天孰知辱榮執經相從至者如雨俾各有得如飲
河鼠荏苒歲月謫居六菁恩典方及嗟公已歸士之升

沈漫不可料豈謂如公獲此非報位既弗達命亦匪延
莫可致詰悠悠昊天旅櫬南歸祔于先壠一望愴然淚
雨如涌潔觴薦俎用慰爽靈同年之誼死生之情嗚呼
哀哉

祭母舅何公文

噫維我母喪在孩提賴有舅在如睹母儀辱仕中朝家
累是隨扶持左右得所怙依中道顛沛累卵之危周旋
拯濟易險為夷解網歸來復承咲嬉為別未幾獲毒遽

罹飲恨而終怒觸山摧厚德未報痛莫可追越在南服
夢想神馳敬陳一奠情寄此辭

祭墓文

維我祖宗世積德善錫福垂裕啓佑後人致有男岳發
身科第繼入翰林授職編修獲沾祿位茲者歷官三載
乞假歸省追念聲容莫覲瞻望封塋曷勝哀慕謹以清
酌庶羞敬伸薦奠伏惟尊靈來歆來格

祭姊夫吏部主事徐公文

昱金華武義人

惟公夙負材器秩授天官典司封爵有聲朝端仕路方
亨遽思勇退解組歸休不貪名位優游林壑以道自娛
高風清節可敦薄夫負郭有田耕食自足泊然無營賈
拔塵俗維我有姊早歸於公偕公東歸思慕曷窮昔我
來杭片帆東下竟達武川獲伸情話回首未幾我姊淪
亡豈意今日又聞公喪子雖先傾有孫克繼女亦有家
心無累係壽踰八十令終歸全路阻莫弔心焉怛然東
望傷神淡烟殘日再覲無期百酸交臆遙致一奠武表

寸忱靈爽如其來鑒歆

百日祭蕭廷璧文

惟公有才有學有識有謀累試不偶一疾遽休志無一
成熟不痛惜日月不居倏臨百日君每期我許用朝端
今果見用君已蓋棺使君生存其喜必倍今焉知否九
原茫昧念交義永隔死生特陳一奠以告幽靈

祭定襄伯文

惟公間氣所鍾天挺人傑炳炳文謨桓桓武烈博極羣

書一覽即徹形於述作日光玉潔旁通六藝種種精絕
器宇豪邁魁梧宕跌開國元勲世承閎闢翩翩貴介材
氣卓越早以國姻宮闈進謁糾糾雄姿龍馬蹀躞帝曰
虎臣留侍禁闕帶刀宿衛忠勤罄竭蠢茲麓川蕞爾狂
孽一旦興迷肆行寇竊皇赫斯怒整旅遏滅受命徂征
兵柄手挈乃佐元戎耀武蠻粵深入賊境擣其巢穴磨
楯走檄越江飛楫牙旗所指靡不摧折我武維揚百蠻
畏懾賊窮送款南徼有截奏凱還朝天顏夷悅位進都

督寵冠朝列乃眷西顧雲中守缺乃簡於衆公宜受鉞
推輪往鎮虎符龍節威宣萬里雷轟電掣外蕃狡凶邊
城犯劫帝詔親征齊驅駟驥軍聲沸騰瀚海為熱六龍
所臨視敵如蔑豈意權姦矯制駕劣車駕蒙塵行營渫
血敵來誘我臨城詐譎公欲潛師可還聖轍敵覺而遁
謀成詐泄義胆忠肝可貫日月敵抵近郊敢恣猖獗公
率壯士短兵交接斬馘無算追奔逐北人畜邀回散滿
山垓敵遭敗衄於焉蹶足蹶邊陲以寧和議始決露布以

聞獻俘報捷論功第一時無與埒乃進伯爵茅分土裂
金書鐵券垂裕後葉赤心籌國言極剴切擾地有龍飛
天網設神謀妙算機智明澈古有孫吳公為超軼事定
召還帝嘉勲業命守南都境宇清帖胡為左右已進讒
說西土居閒著書不輟我皇馭極夢想賢哲虛席以俟
總理戎牒人望所歸輿情允愜出入相將方召穆葬六
師奮張四裔震疊遽謂老成不臻耄耄封侯賜謚卹典
輝煜靈輅南來瞻望哽咽聚寶之山風氣完結妥魂於

斯千古永訣敬陳一奠情深物褻宰樹棲風助我悲咽

祭王司寇文

樂

繫國家之用賢惟老成之倚仗顧董正於五刑乃於公
而是望何司寇之暮年遽溘然而凋喪夫股肱之才良
動縉紳之悲愴念當公之早歲登甲第以發身陟秋臺之
郎署體欽卹之至仁持三尺之法律伴枉雪而冤伸致
刑清而民服為明時之鳳麟尋擢叅於湖藩繼暫佐於
汴省既正位於外臺振憲綱而肅整復召居於棘寺挈

廷評之襟領終進位于六卿冀調元於台鼎荷聖心之
眷注若臯陶之任專錫三代之寵誥沐雨露之恩偏年
未幾乎六袞命已掩乎重泉竟賫志而長往不慙遺於
彼天嗚呼國有黃髮則謀議審朝多君子則治道隆如
公等胡厭世而委蛻在我輩徒杖淚而捫胷孤櫬返乎
冀此一舸下乎江東敬臨風而致酹蓋上為朝廷之痛
惜而下以盡僚友之私衷

祭少保吏部尚書兼文淵閣大學士彭公文時

稽古之學濟世之才出登科第為天下魁入官翰林文
名早著薦居內閣深承恩遇侍帝左右近日月光遂進
侍讀入長春坊繼遷太常職兼學士黼黻皇猷典司內
制薦承寵擢天官亞卿尋居司馬秉持鈞衡乃陟崇階
位大冢宰表率百僚平均四海保護太子進秩三孤為
國元老輔翼匡扶眷命益隆三公之少寅亮天工經邦
論道朝廷委任方切倚毗云何一疾泰山其頽縉紳驚
惶天子震悼卹典褒揚加封易號謚曰文憲贈以太師

哀榮終始疇與等夷猗嗟我公名位已極所乏者壽人
爭惋惜爰命祭葬聖恩惓惓魂歸故里丹旌翩翩舟次
龍河言還有日凡我同儕孰不傷盡敬陳一奠聊表素
情靈其歆格有淚如傾

祭太常寺少卿贈禮部侍郎學士林先生文

文

於惟先生鍾靈毓秀學問淵弘德性溫厚早領鄉解名
重南金掄魁甲第入官翰林史館編摩纂述精確進侍
經筵緝熙聖學敷教中秘師表近臣清名雅望推重縉

紳儀舉雍容特立朝著淳然可親瓊林玉樹待人處已
惟誠是存汪汪之度莫測其津朝之正人世之君子雖
老彌壯遽思知止懸車桑梓益樂壽康豈意一夕善人
云亡天不懸遺為範鄉邑哀訃遠聞孰不悼惜某等嘗
與先生昔侍同朝魂今逝矣杳不可招遙望南天閩山
迢遞一奠寄哀爰伸舊誼

倪文僖集卷三十

欽定四庫全書

集部
倪文僖集卷三十一

詳校官庶吉士臣陳若霖

中書臣劉源溥覆勘

總校官檢討臣何思鈞

校對官中書臣汪學金

謄錄監生臣林大本

欽定四庫全書

倪文僖集卷三十一

明 倪謙 撰

方外

古詩五言

題辛冲和雲谷軒

浮雲起巖石，靄靄能成霖。乃棲崖壑間，結茲數畝陰。變
化寧有跡，卷舒本無心。若人守雌者，內觀趣彌深。茅蓋

隱玄關迥絕纖埃侵終朝味道腴何必嬰華簪心遠境
自僻豈必巢雲林淵默養冲和兀坐萬慮沈古人若逝
水孰能遺至今長生有真訣休沐容相尋

題畫送姜惟寅

山人住蓬萊瑤草俯堪拾茹之可長生紅腴好顏色一
朝駕蒼螭凌雲朝紫極天門笑相遇已注真仙籍別我
下江東何以慰相憶囊中九轉丹還應乞餘粒

贈濟川航上人還京

深山多白雲散漫隨飄風滄海有浮萍飄泊無定蹤人
生四方志況乃為禪宗江湖足行脚幽勝靡不窮昨來
挈詩瓢長吟度居庸浮杯桑乾水振錫燕然峯老我居
楨陵一笑忻相逢跣趺共情話萬事回頭空邊城落日
黃朔吹號寒冬拂衣歸舊隱南邁如驚鴻嗟我誤儒冠
何由脫樊籠臨風起深羨離思徒冲冲

古詩七言

魏尚書墨竹為靳上人賦

我昨移棹遊湘皋
瀟瀟西風吹鳳毛
嫩涼輕透白苧袍
推蓬把酒歌離騷
仰觀勁節排雲上
綠玉交加靜相向
落穉宜裁漢祖冠
翹枝欲化壺公杖
羲和鞭日秋陰清
扶疎影重美晚晴
耳邊忽聞鷓鴣語
鉤輅格磔林間鳴
竭來久作瀛洲客
夢想奇遊知未得
偶從精舍見圖畫
墨花尚帶江雲濕
上人愛此如拱壁
重是司寇尚書筆
此君何可一日無
幽窗坐對心神懌

題彭道士山水畫

黃冠本是仙者徒，慣寫萬壑雲模糊。
酒酣袒跣倒墨汁，興意所到成狂呼。
長林蔽虧知遠近，野水微茫疑有無。
包藏元化在胸臆，不讓前代方方壺。
平日相聞不相識，往往縑藤睹真跡。
定應縮地街通靈，雁蕩匡廬移咫尺。
空山無人耕白雲，但見家家橫屋脊。
我欲尋幽一問奇，不知誰是揚雄宅。

郭熙山水圖為丁道錄炯然題

仙家洞天三十六地脈，獨數華陽靈。
我師佩印主其所，

霧閣雲窗常不扃。支鐺玄夜煮白石。飛檄白晝鞭轟霆。
茅君禮罷月如水。控鶴直入秋冥冥。玉皇聞師司下土。
召赴彌羅紫霄府。命臨真境向蓬萊。玉佩霞裾綰簪組。
舊遊為別今幾春。時憶家山魂夢苦。危峯飛瀑正當門。
閒却長橋跨溪澣。郭熙畫手稱良工。運毫命意趣不窮。
當年應預寫句曲。深林邃壑何其同。我師得此如拱壁。
索我開圖着詩筆。賦詩看畫思飄飄。何須更躡王喬舄。
正月十七日謝省長老過訪

碧峰老師八十餘松姿鶴骨清且臞春來自負足輕健
徒步訪我新樓居憶昔我師年正少詔選來宗法王教
法王返旆向西天北上京師覲天表大齋修建沐恩輝
給牒復許江南歸歸來默坐守空寂深隱禪關依翠微
久向山中厲清苦雙舄何曾入城府念我如乘雪夜船
逸興翩翩孰能阻感師意氣真古人平生交契老益親
年華迅速四十載愧我蹤跡猶紅塵我昔歸休樂泉石
曾向山中候巾舄只今復握南省章路阻雲峯隔秋碧

師精易道妙入玄神機深得一行傳吉凶悔吝掌中見
談鋒落口鏘流泉坐倚南牕話情舊洗盡胸中塵土垢
雖無清供出伊蒲喜有名言破孤陋興闌別我還碧峰
手內却嫌扶短筇出門一笑不返顧飄飄兩袖揚春風
臘高逾八今望九知與須彌同不朽待我來攜一瓣香
敬祝我師千歲壽

律詩五言

送羽士吳道璇

穩著飛雲履還乘犯斗槎
蓬壺拾瑤草勾漏覓丹砂
野嶠應看奕仙源或飯麻
何時拂苔石聯坐讀南華

松隱為羽士吳碧山賦

老樹不為棟山人應共潛瘦
枝橫鶴骨密葉洒龍髯
翠色侵孤榻秋聲落四檐
蒼精宜駐景服食定能厭

寄珍上人兼柬聰公

南國違支遁于今已十秋
紺園成久住白業自精修
思演林間梵待歸江上舟
遙知聰侍者清意滿高樓

律詩七言

送晤上人見中住延慶

一襟歸興下林丘，方外芒屨足勝遊。
碧漢有聲聞錫過，滄江無浪見杯浮。
蓮花漏滴祇園晚，貝葉經繙石榻秋。
談柄宗乘應大闢，賸馳清譽滿南州。

靜菴為定上人賦

把茅為蓋靜為銘，斷盡塵緣養性靈。
花雨曼陀時散彩，林開簷蔔自多馨。
蒲團定起雲生衲，石鼎香消月滿庭。

已覺禪心如止水須妨投礫試清冷

春谷為神樂沈道士賦

和氣薰蒸徧九坂谷中風景勝蓬萊
天桃艷李能紅白舞蝶遊蜂信往來
別有壺天行日月全無世路接塵埃
從今解得尋君處夜夜丹光燭上台

姜羽士涵碧軒

天上五城十二樓此樓直接鳳麟洲
翠華當戶山如馬碧影涵窗水似油
鶴氅乘風寧受暑鸞笙吹月寂宜秋

飛仙弭節神清爽安得相隨玩白鷗

題畫送姜惟寅

久別相逢白玉京仙官欲陟太常清十年夜雨瑤池酒
二月春風紫禁鶯江上魚龍迎桂檝山中猿鶴候霓旌
夢梅猶抱烟霞癖接武天衢好致聲

夢梅者予舊友趙惟寧也

送宗華上人主杭普福寺

佛印相傳屬惠能蕭然塵外一高僧遠歸天竺湖邊寺
暫數長干塔上燈紫竹秋巖和月卧綠蘿春徑撥雲登

何當躡屩分清賞共指雙峯話葛藤

送戒璇住蘇州定慧寺因得省祭

妙年奉檄主禪關杖錫寧親故里還
宰樹近連祇樹綠衲衣新換綠衣斑
丹青勢出煙霄上鍾磬聲傳紫翠間
選佛場開花雨散方袍來會有諸山

贈濟川杭上人還京

殘冬分手向郊垌路入重山挹翠屏
上谷已遊秦郡縣燕然曾訪漢碑銘
朝來清供蒼龍鉢雪後歸裝白馬經

行觸禪心總詩趣吟成莫惜寄邊亭

庭松偃翠月如銀一錫南飛邈莫親
芒屨正侵邊地雪衲衣不滌塞垣塵
道傳乾竺機緣息詩擬湯休句法新
回首居庸暮雲隔天涯誰念未歸人

松鶴軒為丁羽士賦

長松幾箇傍簷楹老鶴如童靜不驚
劍氣晴衝蒼雪冷丹光夜燭縞衣明
九臯聽徹神偏爽五粒餐來體自輕
間向爐中添艾納一琴相對有餘清

答趙惟寧羽士惠詩次韻

詔許休閒故里歸聖恩深念侍儲闈黃金腰下慚橫帶
白玉堂前憶賜衣世上面朋秋露薄眼中心契曙星稀
新詩慰我情偏厚沐手吟觀向夕暉

夏仲出郭歸遲暮投山寺而宿與無垢澣上人坐
話漫興賦此

僧房宴宿境幽偏野衲巖棲不計年木食草衣脩淨業
薰爐經卷伴枯禪雲生坐石諸緣斷月印寒潭一性圓

曉起揚鞭入城去南山回首羃嵐煙

七月四日避暑天界禱上人西菴

號天祥

西菴避暑遠尋盟洒面松風夾道迎竹塢披襟毛骨爽
石床欹枕夢魂清庭前樹古知僧臘林下雲閒識宦情
大地蒼生望霖雨憑誰呼起鉢龍行

草堂歸隱為大覺住持渙性源瀾性海賦

相攜無著與天親卓錫誅茅遂隱淪世外不生塵土夢
山中共息水雲身煙霞閒伴初歸客猿鶴歡迎舊主人

悟得真空諸念寂草堂風月倍清新

贊

無際畫像贊

廣顙豐頤鼻頭垂下是誰露一毫端覲著非真非假道
印古拙吟坐蜀山逮下徵以鳳詔遂遠覲乎龍顏開解
脫門守毘尼藏住法席之宗師為緇素之皈向匪獨自
利兼欲利他遊如來寂滅之海等功德恒河之沙莫從
幻相深求要識箇中風味一輪浩月澄江萬古長空無

際

張仙神像贊

六星煌煌耀斗極降精委靈著奇蹟神司若謀福寰域
好生之仁合天德手挽長弓姓可識子囊累累富儲積
有求必與無所惜盍觀耆蘇得轍軾格不可度矧可射
凡百君子尚翼翼

維摩贊

維摩在昔以滅為樂四大增損百病俱作有身是累私

智所鑿一性真如無病無藥嘆法門不二任人行撒手
超然登正覺

九霞道人范玄宇像贊

鶴骨之清松姿之古翠羽衣裾玄雲步武炯神明其內
腴澹冲和其外睹樂奏六律至音資以諧和法受五雷
元氣屬其吞吐其飛神也仙洲鳳麟其訪道也名山龍
虎遂致進經籙之清階主真人之紫府觀其鞭笞鬼魅
則羣邪伏藏叱咤風雲則甘霖沾溥此其人蓋誠格高

穹功施下土壺公之儔旌陽之伍其自號曰九霞者豈
其餐日精於東華觴瑤池於西母者歟

泉銘

天馬山幽谷菴玉乳泉銘

并序

太平之當途有鄉曰歸善有山曰天馬境深地僻人跡
罕到其東則有天王山峙其左其西則有黃渺山環其
右又有老目山拱其南大現山擁其北四顧盤互為靈
秀所萃結居民濮氏據山之西而家焉濮之祖嘗睹山

東最勝之處而愛之曰此地宜建佛刹非凡民所當處也乃構草堂三間其上莊嚴佛像名曰幽谷菴延僧以主香火既而物故繼者乏人有宗受上人者號心印杭之仁和人自幼出家西湖之靈隱禮韜光真如海為師授禪教遍遊名山參禮耆宿嘗憇錫大報恩寺景泰間去遊當塗濮之彥曰晁一見上人若有夙契遂敦請以主斯菴上人方倦行脚顧其地真足棲禪遂從其請於是翦榛蕪拓舊址重建佛殿三間左右廊廡禪堂庖廩

十間象設供具靡不完備丹牖金碧照映山谷蔚然為
一佳刹也第所恨者山高而峻石堅而頑乏水以給僧
衆每取水直抵山下澗邊輒汲相去一里有半山勢陡
絕肩不可擔用筒背負祁寒暑雨踐冰霜觸炎熱犯淋
漑艱辛萬狀成化甲午經歷李公玉衡精於地理嘗至
山中上人語以乏水之故公指山左石上而告之曰此
中有水何不鑿之上人乃焚香禱於佛殿及山神隨其
所指而鑿焉施工至二丈餘果見水泉湧出甘冽香美

泛溢而上足充菴給鄉人聞枯石得水奔走聚觀嘖嘖
歎異上人於是介玉衡來京謁予請賜泉銘并乞名以
紀其事將傳示永遠予為名其泉曰玉乳而記之曰人
必資食以養生食必資水以烹飪故一日無食則餒一
食無水則廢是則水者日用之尤切而不可缺者也況
乎斯菴也食指頗衆粥魚齋鼓開口待哺而苦於無水
艱於遠汲若之何而不告病乎一旦遇李公而指示之
遂能得清泠於山椒出雲液於石窟汲之者謝險阻而

就平易自是絕負筒之勞去陟降之苦果何由致此哉
實出上人戒行精專誠意感孚是以山神効靈佛力垂
佑假乎李公以發其秘也豈偶然哉是不可以不記繫
之以銘曰

水行地中實維土脈石也燥剛水何由得繫維幽谷山
骨厚堅飲啜之養乃資澗泉里半有餘方達澗潄負筒
遠汲登降良苦衡也今璞天牖其衷獨具神鑒啓室為
通石竇發祥源源不息豈伊山靈泄茲髓液積誠所感

金石為開地不愛寶潤澤後來汲者免勞飲者獲濟匪
由上人昌臻斯異昔八功德移自竺西今穴此孔將無
與齊石中得泉詎非玉乳錫名作記永示千古

倪文僖集卷三十一

欽定四庫全書

倪文僖集卷三十二

明 倪謙 撰

方外

記序說 跋茶榜塔銘

海天秋月記

京口姚道宗氏務神仙學有蛻世出塵之志始受業於
朱公可名之門繼從姜公可常學五雷法雲中玄濟張

先生予識也深於丹學之秘道宗復從而師之常與邇
迴邀泳海上尋安期羨門之屬訪方壺懸圃之侶時值
秋夜海月麗空皓彩奪目恍若置身廣寒清虛之府而
挹桂子之天香也因以海天秋月自況一日玄濟先生
偕道宗黃冠羽衣謁予館下袖出是圖徵記其事予惟
天包地外地處天中天地四方莫非海水所通其大無
窮其深叵測月則陰精與天同運而不及有體而無光
其盈虧也以受日之光多少遠日則光滿近日則光盡

海惟深且大故月之出沒望之皆在於海夜當夕陽既
收列星有耀水天相薄遐邇莫辯狂濤洶湧萬變惶惑
吁可駭畏也已逮冰輪挾潮東升纖翳不干影落淵底
上下合璧激盪動搖金輿翠旂隱現鯨波之上常夜之
月莫不皆然惟九秋之夕天高氣清萬境澄澈兔魄光
明於斯特甚幽隱畢燭洞察毫末珠胎蚌母含英孕華
魚龍鼉鼉蜃樓蛟室但見踴躍後先光恠明滅此海天
之月所以宜於秋也道宗以此自況其意豈不以為海

天之月亘古今而常存者也然吾心之明不猶秋月之光乎心之處形氣之內不猶月之運於海天乎蓋欲探陰陽之機體兩儀之妙保鍊其形氣明其性真而遺世獨立後天不老者也其意不亦遠乎夫學道易守道難羽流有是言也道宗立志若是可謂善學者也尚宜信守弗懈他日九轉功成殆見坐泛仙槎遊遨斗牛銀渚上倘得顧兔不死藥不識肯以刀圭見遺否也遂書以

記

翠松記

茅山玉晨觀住持希安杭鍊師方外士也山中多古松盤薄而偃蹇翠色高寒凜然若辟穀仙人癯然離立之狀希安愛之因以翠松自命而徵記於予予觀古之離塵絕俗之士莫不寓意於物而未嘗累於物故烟雲月露林壑水石變化倏忽流峙無窮凡可以適性情之正者則皆取以自近至若草木之微其芳潔孤高生意暢茂尤易以感人之情而為人所愛若靈均之蘭蕙小山

之桂樹子猷之竹淵明之菊和靖之梅茂叔之蓮樂之
終身不厭至形於詞詠以寫其情之數子者其天分之
高興寄之遠類非汙陋之士所能窺其萬一初非物於
物也獨松也未聞為人所愛而希安取之其寓意得不
有類於數子乎哉蓋松物之壽者也其翠色貫四時而
不變歷歲寒而後凋注沆瀣之華薄日月之光白鶴棲其
顛清泉沃其根靈飈時至聲振笙簾希安遺世獨立鍊
精保形朱顏若童其比德將無翠松之似乎宜其冥契

於心而見取之深也希安茲提點觀事而斯觀相傳為
展上翁開基歷周秦漢晉至人高士往往於此登真至
梁陶貞白即其地建昭真臺以藏諸宗師丹經寶冊唐
改紫陽宋改今名寔霞外勝地也希安少慕玄學親得
以文杭公暨長春劉真人所指授故造道深詣不惟力
樹宗門繼前修之道德而寓物自適之趣復有類於古
人是豈汙陋所能窺哉或曰千歲之松下有茯苓食之
令人壽昔偃佺食其實能飛行如走馬希安所取容或

在此予曰審若而言乃假於物而累於物非知鍊師者也不可以不記尚俟見希安而訊焉

愚樂記

江陰鄧太初氏有道之士也能用五雷法効治鬼物及禱禳皆有奇應成化四年夏禱旱黃州巴河市致玄帝兩現像於霞光之中秋禱旱羅田亦現霞光五色雨皆大澍人以為神異爭敬事之嘗以愚樂自號頃遊京師介羅田尹徐君士亨謁予因請記其所號愚樂者予聞而

疑之孔子曰知者樂未聞愚而樂者也夫愚者氣質暗劣之謂得賦之偏者也菽麥之不分是非之不明膠柱調瑟見剛廢屨曹曹然若擿埴索途而莫知所從也昧昧焉若塵鏡晦蝕而莫知所茹也是故學者必刮磨克治以裨其偏學問思辨致其知也篤行踐其實也人已百人十已千功施倍也然後氣質之愚始可化而為明焉今顧以愚為樂是乃安於愚而不知學也其可乎哉況太初能旋乾轉坤駕風鞭霆無不如意愚者固如

是乎或有在坐者曰太初非不學者也其將學顏氏之
子乎顏子學於仲尼聞其言不違如愚人而已及其退
也居陋巷之中簞食瓢飲不改其樂是其愚非真愚而
樂乃真樂太初之愚樂其在是乎或曰太初非學顏氏之
子也太初老氏之徒其學老氏者歟老氏之言曰我愚
人之心也哉沌沌乎俗人昭昭我獨昏昏俗人察察我
獨悶悶愚何加焉然又必曰我獨異於人而貴食母夫
無名天地之始有名萬物之母乃大道之玄德也頑鄙

無知獨貴玄德則全純抱樸虛無自然而有感必應此其所為樂乎予聞二人言疑尚未決乃折衷於士亨士亨曰二說不同後說近是遂書為記以復太初太初其亦以為然乎否耶

送道士徐得振歸虞山序

姑蘇常熟之虞山有壇宇曰三元凡修真樂道之侶多栖跡其間道士徐得振者則其一也得振年富質敏慕老子法遂遺棄人間事從主致道觀鍊師李啟陽遊茲以

尚未給部符至京請授既霑聖恩飛鳥南還鄉友呂志祥輩要予文以贈行太史公曰道家之術以虛無為本以因循為用凡人所生者神所託者形形用則竭形勞則蔽形神離則死死不復生離不復合故聖人重之由是言之則知世之宗其教者是蓋合其離生其死固形存神後天而老者歟自柱下史以道德五千餘言唱之於前而後和之以莊列其流寔遠其言愈熾今其琳紉琅函至於充棟自匪得於真傳曷能闚其門徑哉歷

世以來高人奇士克臻厥妙者載在仙史不可謂無矣
意所行必有其序所造必有其方得振歸於虞山逍遙
物外漱石枕流吞煙霞而飲沆瀣不知紅塵野馬隔方
壺於幾重也尚即其書而索其理因其人而驗其實一
旦心領神會九轉功成將恐若緱山之鶴長揖而謝世
矣得振勉諸試歸而叩之於師亦必以予言為然

神京別意詩叙

祭天神祀地祇享人鬼茲國家之大典也然其鐘鼓玉

帛之將升降擊拊之節自非廉靜寅清妙解鍾律精閒
儀度之士以贊相對越於其間烏能來朋蟹而致蕃釐
也哉維寅姜先生出自姑蘇名族性資警敏神情高亮
早謝塵俗寄跡老子法中國家建天壇於都城東隅即
其傍萃多士而居之俾執天地百神祀事而維寅寓焉
樂之奏和而有倫禮之行秩而不紊蓋其心志專一而
恒存乎敬者然也所謂廉靜寅清之士非歟正統初太
常列卿以其才行適等擢居典脩服勤効勩年所多歷

今年春乃具疏薦之於朝進授南京太常寺贊禮郎先
生既受命治裝將還中朝縉紳所嘗交好者咸繪圖賦
詩以叙別彙次成帙題曰神京別意謂予於先生尤舊
屬首叙焉嘗憶正統庚申予得請南歸謁先生於涵碧
樓上掀省笑談焚香煮茗彈琴賦詩意氣相得已而出
嘉醞觴酌握拳呼射劇飲懽甚天忽阻我以雨遂與連
榻數夕倚闌聽竹潺潺作碎玉聲恍然如入方壺圓嶠
不知身在人間世也自抗手一別于今十年每念斯樂

未嘗不神俱往也今先生名重薦書位列清選復得展
良晤於官舍叙好平生喜懌方殷而先生遽回轅南指
矣予之心詎能釋然乎雖然予有二親在堂朝廷方崇
孝理不日辱賜封勅其必容一省覲而歸可卜矣先生
往哉尚俟我軒楹之側春日載陽碧桃始花予將於是
而尋盟焉姑書此以先之若夫職業之脩祿寵之厚此
固先生所素能而宜得者有不待予言之贅也

贈萬全都紀蕭鍊師序

萬全都司道紀司都紀志淵蕭鍊師居宣府朝玄觀主
盟玄教為傾城所嚮慕暇日余嘗往訪之見其方丈之
室中列玄像事之以香燈鐘鼓甚嚴而壁間所懸復有
方巾褒衣耆宿畫像疑為世間得道高士之流而祇事
亦謹詢諸鍊師曰此何人斯鍊師曰此吾所生之父景
行居士也吾世家錢唐少慕玄學洪熙改元年十九辭
父母出家於杭之長春菴投禮都紀靖和袁公為師宣
德二年去遊龍虎山進謁正一嗣教四十五代張天師

蒙傳授五雷祈禱大法四年北上京師聞鄉先哲履和
養素崇教弘道闡法通靈周真人居大德觀乃詣受教
蒙傳授靈寶齋法八年鎮朔將軍總兵官永寧伯譚公
奏請開設萬全道紀司蒙朝廷授以前職今歲吾年五
十有五矣遠離父母已三十餘年而晨昏甘旨之養未
嘗得一日侍於其側以申其孝念欲回杭省侍奈為卑
職所縻而不能遂也不幸吾母早世吾父年已八十慨
慕容儀耿耿于懷乃寓書族人為圖父像轉寓吾所庶

幾得見顏面雖不能承懽養志諧膝下之娛而獻壽稱觴亦聊以盡客邊之奉此像是也予聞之躍躍以喜曰世之所謂道家者流率以割恩斷義為高而遊乎方之外率以鍊形存神為事而超乎物之表不知此身者何自而生欲鍊存形神乃割斷恩愛而忘此身之所自是自絕其本矣尚足以為人哉尚足以為道哉今鍊師雖寄跡老子法而立心制行顧與吾儒之道不悖謙沖而簡靜踈通而質直拳拳焉不忘其親而畫像以事之將

欲報其恩著其愛而姑為是不得已之為者是亦孝子之至情也使其果獲侍親之側其孝當何如宜其於道有得而異乎尋常忘本之徒萬萬矣予於是賢之為延譽於人人而同具秉彝者亦翕然賢之屬序以贈夫樂道人之善君子之道也故為書之不辭

五臺山倡和詩集序

五臺山在雲代之間峯巒有五巍然若臺故以名焉在昔相傳為文殊示現之地往往有神光之異號為靈山

又名清涼山柳宗元送文暢遊五臺所謂將與文殊不
二之會是已其巖壑雄秀林木茂密凡幽絕之境多為
僧寺所據金碧樓殿輝映山谷靈踪古跡所在有之世
之縉流素士慕茲山之勝而躡屩來遊者肩摩踵接日
有其人然未聞有能形諸歌詠以傳於世者豈其僻居
一隅而聞人韻士未有一駐足者歟抑雖有作者而無
好事者以傳之歟千載寥寥惟宋相張商英提點河東
刑獄時曾遊於此賦律詩六章載在清涼傳遂為古今

絕唱雲中僧覺同師雖學佛氏而善楷書喜吟咏靈區
奧壤多所涉歷亦嘗來遊是山登覽之餘詩思煥發乃
取商英所作倚其韻而和之既而來遊吳會南過金陵每
遇作者輒舉似之亦皆為之屬和積而成帙題曰五臺
山倡和詩集由是茲山名勝抉幽探奇搜羅殆盡矣豈
非茲山之遭也歟師既楔梓以傳徵言為弁天下名山
大川乃天地清淑之氣磅礴而鬱積其靈秀所感降而
為人則生聖賢命世之英若尼丘之尼父崧高之甫

申是已鍾而為神則成仙佛幻化之境若崆峒之廣成
句曲之茅君補陀之觀音五臺之文殊是已未易徧舉
然其事載於詩書其跡紀於志傳必待考而能知非若
聲詩得於諷誦之間而易足以感乎人也覺同師知其
然乃於五臺若有夙契特取古作載賡送和廣傳於世
豈惟使天下之人歌詠之頃有以知茲山之勝大士之
靈抑欲感發其心咸懷嚮慕同趨覺路而入不二之門
者也其志不亦大乎是可嘉也遂為題於簡首云

無聲詩序

金陵羽士丁惟正從其師道紀曹公於雲間其神清以腴其氣夷以和其道得玄虛之奧其趣脫塵凡之陋歲嘗還金陵訪故舊親戚往來不厭頭戴華陽巾身被鶴氅衣或飛雙鳥於吳門之墟或抗一葦於江濤之上人望之飄飄然神仙中人也性好詩兼好畫遇良辰佳景觸目感懷輒形諸詩詠思致高遠辭旨俊逸真不喫烟火食語其所交與皆方外名流儒林奇士賡和唱

酬以抒寫其胸中之妙略非世絆可得而羈紲者凡士之工
於繪事者必具指墨請其著筆人亦樂為點染以投其
好所得甚多蓋其所寫不過以狀古人詩意初非庸史
俗工研丹塗鉛競華騁麗者可比也間嘗出以見示則
見其峯巒起伏烟雲變滅長林古木山村野墅與夫寒
汀遠渚酒船漁艇之景燦然溢目所作非一人所圖非
一境莫不各極其閒雅之趣探造化之妙焉惟正請題
於予并求序引予為題曰無聲詩蓋以詩中之妙有畫

畫中之妙有詩詩乃有聲之畫畫乃無聲之詩也惟正時取是畫而閱之開卷之間莫非詩意則其所可歌者不以口而以心所可聞者不以耳而以目意之所會將不手舞而足蹈乎且仙家者流多隱跡名山洞府靈區奧壤之間市廛之喧鮮得而溷焉惟正雖遊戲人寰而其襟想固超埃壒之表是以愛夫丘壑泉石之勝於豪端萃而玩之則其境與心融殆必從赤松招偓佺偕安期羨門相與神遊於閬風玄圃之中瀛洲蓬島之上者

矣又豈常情所能窺其萬一哉惟正聞予言乃劃然長
嘯有若鸞鳴鶴唳徹於烟月之空嗚呼惟正其有道之
士乎哉遂為書此以為無聲詩引

九峯禪要序

世尊大法自迦葉二十八傳至菩提達摩流入震旦乃
弘教外別傳之旨謂不立文字單提直指可以見性成
佛此禪學所由始也達摩之後六傳而至大鑒大鑒之
後五傳而得臨濟若今默堂照禪師則臨濟二十四代

之法裔也師父母早亡年十三志願出家入蜀山遇衲頭正和尚遂師事之尋往道林叅無際宗師深得玄奧後禮潔空和尚於銀光言下有契乃蒙印可退隱九峯之東印者數十年叅究玄機精進不怠脫然頓悟心境圓融畧無滯礙故其形諸提唱凡升堂示衆及詩詞歌偈等作一一無非發明向上大事俱從真實踐履及肺腑中流出即非擬議而成直而不俚顯而無跡真救病之良方甦旱之膏雨濟生死苦海之舟筏也門人圍太

虛以師平日所說亡佚者多近即其僅存者編集成冊
題曰九峯禪要將鏤梓以傳以求予序予聞單傳之道
以靜默為本師於接物之際乃費辭說致多如是何耶
殊不知師說而非說非說而說覽是錄者誠能不即文字
不離文字於其言意之表恍然有得始信本來面目各
無差別斯不負師喫緊為人處矣苟徒事尋行數墨譬之
蜂鑽窗紙欲求出路何可得哉師形若虎踞音吐洪暢剪
髮留髻其長過臍世壽七十有五說法三十餘春門人

四十餘衆示寂東印闍維得舍利甚多可謂善於智識者歟予嘗於斯道而來意悵惘不可無辭以復也用是勉為書此以貽夫世之禪學者

航上人字濟川說

僧錄右街闡教古心堅公有上足弟子曰戒航字濟川者姑蘇琴川人也夙有至性警悟不凡精究內典而於儒書亦多窺闚喜吟咏作為韻語清新洒脫無疏筍氣故名動江湖有能詩聲嘗典大隆福寺書記及主維摩

寺比者躡屨振錫來遊宣城將窮探塞北山川之壯風景之美以著於詩遇吾黨之士則樂然相與而不相逆茲非於吾道有慕而墨名儒行者耶間嘗以詩為贄謁予上谷寓舍一見若平生驩方自困於塞雲朔雪之墟忽接詩僧清話以沃塵襟不啻空谷足音之喜也久之告予曰吾師嘗名吾曰戒航禪林耆宿有字吾以濟川者敢請一言明其義以淑吾身予弗容靳乃告之曰書云若濟巨川用汝作舟楫蓋航者兩舟相並之謂周禮

大夫方舟是也川則泉流注海之謂夫水天下之至險者也使非舟航其何以濟之航固濟川之具然篙師舵工不慎其操則有檣傾楫摧之患而不能以有濟矣要在張帆正舵順其所適雖有巨川之險奚足慮哉其達於岸也何有人之濟乎世亦猶舟之濟乎川也私欲之害亦猶巨川之險也使或肆情縱欲而不慎其操則有陷身溺德之患而不能以有濟矣要在正心誠意不惑他岐雖有利欲之害奚能及哉其造夫道也何有詩曰

無然畔援無然歆羨誕先登于岸此之謂也上人學佛者也而有慕吾道故舉吾儒之說以告誡如古之人黜其畔援歆羨之私以濟乎斯世而曰不造乎道未之有也上人年茂性敏勇於精進觀其遺世遠引超塵脫俗固知黜利欲之害矣其能造乎道也審矣遂為說以贈之

跋宋梵僧畫犬

昔支遁好養馬人有譏之者荅曰愛其神駿聊復畜爾

然則僅師畫犬得趣其亦有遁之道歟後乃畫觀音易
舊作蓋亦知非所當好矣韓昌黎嘗言浮屠氏善幻多
技能觀此畫信然宣城士范原博家藏此畫上有米元
章所題真跡可謂二絕皆不易得也

茶榜

緩火炙活火煎鼓陰陽於索齋前浪平後浪湧沸江漢
於釜鬲非關煮蒙頂之露芽自是瀾蓬壺之瑤草丹丘
子服此而輕身換骨玉泉公飲之而返老還童湖海交

游因效采蘋之獻壇場凡聖幸鑒傾葵之誠仍須七碗
平分畢竟一塵不滓渴睡漢從今喚醒長生藥何用別
尋看取冷淡家風賸掃三冬之瑞雪高超清淨境界同
挾兩腋之清風請嘗試之乃所願也

故性天皎禪師塔銘

師諱如皎字性天四明鄞邑周氏子也母金氏師生甫
七歲患腸癰醫剝生蟾蜍以治師見惕然曰物我皆命
也忍害之乎奪而放之父母奇其幼慈曰必佛種也病

愈乃命出家里中觀音院禮正菴中公為師洪武壬申
正菴攜師至京請祠部得度為僧時年二十因掛錫天
界尋受具戒奮然有志學佛首叅僧錄左街善世兼鳳
山住持同菴簡禪師同菴一見器之命處侍室遷典藏
鑰復依南隱正公究明楞嚴經旨講讀晝夜不懈因而
過勞得咳血疾或曰與其劬神若是孰若禮教外單傳
豈不省力師聞之即往方丈叩決同菴舉拂子示之師
茫無領會未幾同菴謝世值正菴主饒之景德師隨侍

偕往舊疾增劇不能安禪欲還天界養病正菴曰吾方
賴汝匡輔汝若去吾獨處此無益也遂退席偕還疾尋
愈聞古拙俊禪師居繁昌乃函香而往重乞開示古拙
命叅無字話頭於是復回天界發憤究竟誓不出山禁
語千日永樂丁亥會古拙奉詔旨天界山居終老師幸
親炙一夕夜靜推簾見月驀然觸破同菴舉拂子因緣
嘆曰原來佛法初不離見聞也翌日詣山居見古拙入
門不作禮震威一喝古拙曰皎上人今日冷灰豆爆莫

是貧人得寶麼師曰寶即不得得即非寶曰憑何恁麼
師即趨前問訊退位叉手而立古拙曰父母未生前畢
竟作麼師屹然一默良久古拙曰還我向上句子語未
絕師以衫袖幪首趨出少選古拙師與無相玉峰同飯
玉峰問古拙曰皎知藏適來酬對若何曰見牛矣未得
入手也因飭師曰此亦大事要得徹底風光正好用功
在師因呈偈云午夜推簾月一灣輕輕踏破上頭關不
須向外從他覓只麼怡怡展笑顏古拙閱之以掌撫師

背曰此正是持不語底人也汝既得之且可去水邊林
下頤養道胎亦以性天二字述伽佗為之助喜云皎然
心地冷如霜肯為時流錯較量性即是天元一體旃檀
不刻也馨香師承印可遂侍正菴同入南山卜築陽林
嶠以居俄正菴示寂少師勛國公復卜居左為瑩乃飄
然度嶺至西坑別築菴名圓覺居之時甲午冬也自此
影不出山者二十年至坐死闕千日宣德壬子武林請
主虎跑不應明年祖堂幽棲復固請之不獲已一出據


猗提唱學徒雲集未久倦於槌拂拂衣歸隱日與圓明
大宗隣宿往還酬唱優游卒歲而已正統癸亥三月初
示疾至十六日集弟子垂誠曰文章佛法空中色名利
身心柳上煙惟有死生真大事殷勤了辦莫遷延復問
云死生既大汝等且道如何了辦衆不能答徐云我今
無暇為君說聽取松風礮水聲言訖而逝師存日嘗自
壘塔於菴左隴之陽越七日其徒翕奉全身瘞焉師以
洪武甲寅七月二十三日生世壽七十僧臘五十所度

弟子若干人師儀狀魁偉性格清奇度量含宏威檢堅
峻口不言人過失徒衆越度者惟以冰顏示之待其自
化有犯之者怡然不與較兼涉外典書有晉意平日漫
成偈語無非發明祖意以示人其孫祖傳既為結集行
世復狀行業懇乞予為塔銘可謂不忘祖德克篤繼述
之孝者矣用是悉取所述於狀者序之而系以銘銘曰
單提之學直指性原鈍根沈滯孰究生前惟性天師德
本宿植大事懇求遍叅知識始投鳳山繼謁繁昌精進

不懈如百鍊鋼言歸故山苦行益篤緘口內觀如枯槁
木慧月當空了然頓悟如往鷲峰親見慈父把茅蓋頭
深入南山足不踰閭冷坐死關揮麈幽棲聊復出世松
偃山房林泉增媚斂跡薊藏人則向依如大海水衆流
自歸觀化從容飄然隻履苦海航摧法門棟毀有巍宰
堵英山之陞永示來世觀此刻辭

先少保文僖府君自游庠序即負重名平生制作極
富成化庚寅回祿之變岳方歸省于家倉卒之際挈

一笥以出及歸他已無及由是先世所藏蕩然一空
惟先君文藁幸在笥中得存岳即收拾散亡今為百
七十卷鈔錄數本與諸弟共藏之其間有經先君手
自校訂者得詩若文八百九十篇別為三十二卷謹
用刻梓以傳噫自先君棄不肖今且十有五年而始
克就編稽緩之罪誠無所逃因拜紀刻完歲月於卷
之末俾後有考云時弘治癸丑秋八月朔也資善大
夫禮部尚書不肖男岳百拜謹識



倪文僖集卷三十二